

萬 有 文 庫

第一集一千種

王雲五主編

白 香 山 集

(二)

白居易著

商務印書館發行

白香山集

(二)

白居易著

國學基本叢書

白香山集

卷一

諷諭一 古調詩五言 凡六十三首

賀雨詩

皇帝嗣寶曆。元和三年冬。自冬及春暮。不雨旱熯熯。上心念下民。懼歲成災凶。遂下罪己詔。殷勤告萬邦。帝曰予一人。繼天承祖宗。憂勤不遑寧。夙夜心忡忡。元年誅劉闢。一舉靖巴邛。二年戮李錡。不戰安江東。顧惟眇眇德。遽有巍巍功。或者天降沴。無乃儆予躬。上思答天戒。下思致時邕。莫如率其身。慈和與儉恭。乃命罷進獻。乃命賑饑窮。宥死降五刑。責己寬三農。宮女出宣徽。廄馬減飛龍。庶政靡不舉。皆出自宸衷。奔騰道路人。僮僕田野翁。歡呼相告報。感泣涕沾胸。順人人心悅。先天天意從。詔下纔七日。和氣生沖融。疑爲悠悠雲。散作習習風。晝夜三日雨。淒淒復濛濛。萬心春熙熙。百穀青芄芃。人變愁爲喜。歲易儉爲豐。乃知王者心。憂樂與衆同。皇天與后土。所感無不通。冠珮何鏘鏘。將相及王公。蹈舞呼萬歲。列賀明庭中。小臣誠愚陋。職忝金鑾宮。稽首再三拜。一言獻天聰。君以明爲聖。臣以直爲忠。敢賀有其始。亦願有其終。

讀張籍古樂府詩

張君何爲者。業文三十春。尤工樂府詩。舉代少其倫。爲詩意如何。六義互鋪陳。風雅比興外。未嘗著空文。讀君學仙詩。可諷放佚君。讀君董公詩。可誨貪暴臣。讀君商女詩。可感悍婦仁。讀君勤齋詩。可勸薄夫淳。

上可裨教化。舒之濟萬民。下可理情性。卷之善一身。始從青衿歲。迨此白髮新。日夜秉筆吟。心苦力亦勤。時無采詩官。委棄如泥塵。恐君百歲後。滅沒人不聞。願藏中祕書。百代不湮淪。願播內樂府。時得聞至尊。書者志之苗。行者文之根。所以讀君詩。亦知君爲人。如何欲五十。官小身賤貧。病眼街西住。無人行到門。

孔戡詩

洛陽誰不死。戡死聞長安。我是知戡者。聞之涕泫然。戡佐山東軍。非義不可干。拂衣向西來。其道直如絃。從事得如此。人人以爲難。人言明代合。置在朝端。或望居諫司。有事戡必言。或望居憲府。有邪戡必彈。惜哉兩不諧。沒齒爲閑官。竟不得一日。審審立君前。形骸隨衆人。斂葬北邙山。平生剛腸內。直氣歸其間。賢者爲生民。生死懸在天。謂天不愛人。胡爲生其賢。爲天果愛民。胡爲奪其年。茫茫元化中。誰執如此權。

凶宅詩

長安多大宅。列在街西東。往往朱門內。房廊相對空。梟鳴松桂枝。狐藏蘭菊叢。蒼苔黃葉地。日暮多旋風。前主爲將相。得罪竄巴庸。後主爲公卿。寢疾歿其中。連延四五主。殃禍繼相鍾。自從十年來。不利主人翁。風雨壞簷隙。蛇鼠穿牆墉。人疑不敢買。日毀土木功。嗟嗟俗人心。甚矣其愚蒙。但恐災將至。不思禍所從。我今題此詩。欲悟迷者胸。凡爲大官人。年祿多高崇。權重持難久。位高勢易窮。驕者物之盈。老者數之終。四者如寇盜。日夜來相攻。假使居吉土。孰能保其躬。因小以明大。借家可諭邦。周秦宅嶠函。其宅非不同。一興八百年。一死望夷宮。寄語家與國。人凶非宅凶。

夢仙詩

人有夢仙者。夢身升上清。坐乘一白鶴。前引雙紅旌。羽衣忽飄飄。玉鸞俄鏗鏘。半空直下視。人世塵冥冥。漸失鄉國處。纔分山水形。東海一片白。列岳五點青。須臾羣仙來。相引朝玉京。安期羨門輩。列侍如公卿。仰謁玉皇帝。稽首前致誠。帝言汝仙才。努力勿自輕。却後十五年。期汝不死庭。再拜受斯言。既寤喜且驚。祕之不敢泄。誓志居巖扃。恩愛捨骨肉。飲食斷羶腥。朝飡雲母散。夜吸沆瀣精。空山三十載。日望輻輳迎。前期過已久。鸞鶴無來聲。齒髮日衰白。耳目減聰明。一朝同物化。身與糞壤并。神仙信有之。俗力非可營。苟無金骨相。不列丹臺名。徒傳辟穀法。虛受燒丹經。只自取勤苦。百年終不成。悲哉夢仙人。一夢誤一生。

觀刈麥詩 時爲藍屋縣

田家少閑月。五月人倍忙。夜來南風起。小麥覆隴黃。婦姑荷簞食。童稚攜壺漿。相隨餉田去。丁壯在南岡。足蒸暑土氣。背灼炎天光。力盡不知熱。但惜夏日長。復有貧婦人。抱子在其傍。右手秉遺穗。左臂懸弊筐。聽其相顧言。聞者爲悲傷。家田輸稅盡。拾此充飢腸。今我何功德。曾不事農桑。吏祿三百石。歲晏有餘糧。念此私自愧。盡日不能忘。

題海圖屏風詩 元和己丑年作

海水無風時。波濤安悠悠。鱗介無小大。遂性各沉浮。突兀海底鼉。首冠三神丘。鉤網不能制。其來非一秋。或者不量力。謂茲鼉可求。鼉屬牽不動。綸絕沉其鉤。一鼉旣頓頷。諸鼉齊掉頭。白濤與黑浪。呼吸繞咽喉。噴風激飛廉。鼓波怒陽侯。鯨鯢得其便。張口欲吞舟。萬里無活鱗。百川多倒流。遂使江漢水。朝宗意亦休。蒼然屏風上。此畫良有由。

羸駿詩

驕驕失其主。羸餓無人牧。向風嘶一聲。莽蒼黃河曲。踏冰水畔立。臥雪塚間宿。歲暮田野空。寒草不滿腹。豈無市駿者。盡是凡人目。相馬失於瘦。遂遺千里足。村中何擾擾。有吏徵芻粟。輸彼軍廩中。化作驚駘肉。廢琴詩

廢琴詩

絲桐合爲琴。中有太古聲。古聲淡無味。不稱今人情。玉徽光彩滅。朱絃塵土生。廢棄來已久。遺音容泠泠。不辭爲君彈。縱彈人不聽。何物使之然。羌笛與秦箏。

李都尉古劍詩

古劍寒黯黯。鑄來幾千秋。白光納日月。紫氣排斗牛。有客借一觀。愛之不敢求。湛然玉匣中。秋水澄不流。至寶有本性。精剛無與儔。可使寸寸折。不能繞指柔。願快直士心。將斷佞臣頭。不願報小怨。夜半刺私讎。勸君慎所用。無作神兵羞。

雲居寺孤桐詩

一株青玉立。千葉綠雲委。亭亭五丈餘。高意猶未已。山僧年九十。清淨老不死。自云手種時。一顆青桐子。直從萌芽拔。高自毫末始。四面無附枝。中心有通理。寄言立身者。孤直當如此。

京兆府新栽蓮詩

時爲蓋壓尉趨府作

污溝貯濁水。水上葉田田。我來一長歎。知是東溪蓮。下有清泥污。馨香無復全。上有紅塵撲。顏色不得鮮。物性猶如此。人事亦宜然。託根非其所。不如遭棄捐。昔在溪中日。花葉媚青漣。今來不得地。顛頓府門前。

月夜登閣避暑詩

早久炎氣甚。中人若燔燒。清風隱何處。草樹不動搖。何以避暑氣。無如出塵囂。行行都門外。佛閣正岿峩。清涼近高生。煩熱委靜銷。開襟當軒坐。意泰神飄飄。迴看歸路傍。禾黍盡枯焦。獨善誠有計。將何救旱苗。

初授拾遺詩

奉詔登左掖。束帶參朝議。何言初命卑。且脫風塵吏。杜甫陳子昂。才名括天地。當時非不遇。尙無過斯位。況予寒薄者。寵至不自意。驚近白日光。慚非青雲器。天子方從諫。朝廷無忌諱。豈不思匪躬。適遇時無事。受命已旬月。飽食隨班次。諫紙忽盈箱。對之終自愧。

贈元稹詩

自我從宦遊。七年在長安。所得唯元君。乃知定交難。豈無山上苗。徑寸無歲寒。豈無要津水。咫尺有波瀾。之子異於是。久處誓不諛。無波古井水。有節秋竹竿。一爲同心友。三及芳歲蘭。花下鞍馬遊。雪中盃酒歡。衡門相逢迎。不具帶與冠。春風日高暉。秋月夜深看。不爲同登科。不爲同署官。所合在方寸。心源無異端。

哭劉敦質詩

小樹兩株柏。新土三尺墳。蒼蒼白露草。此地哭劉君。哭君豈無辭。辭云君子人。如何天不弔。窮悴至終身。愚者多貴壽。賢者獨賤速。龍亢彼無悔。螻屈此不伸。哭罷持此辭。吾將詰義文。

答友問詩

大圭廣不割。利劍用不缺。當其斬馬時。良玉不如鐵。置鐵在洪鑊。鐵消易如雪。良玉同其中。三日燒不熱。

君疑才與德。詠此知優劣。

雜興三首

楚王多內寵。傾國選嬪妃。又愛從禽樂。馳騁每相隨。錦鞵臂花隼。羅袂控金羈。遂習宮中女。皆如馬上兒。色禽合爲荒。刑政兩已衰。雲夢春仍獵。章華夜不歸。東風二月天。春雁正離離。美人挾銀鑊。一發疊雙飛。飛鴻驚斷行。斂翅避蛾眉。君王顧之笑。弓箭生光輝。迴眸語君日。昔聞莊王時。有一愚夫人。其名曰樊姬。不有此遊樂。三載斷鮮肥。

越國政初荒。越天旱不已。風日燥水田。水涸塵飛起。國中新下令。官渠禁流水。流水不入田。墜入王宮裏。餘波養魚鳥。倒影浮樓雉。澹澹九折池。縈迴十餘里。四月芰荷發。越王日遊嬉。左右好風來。香動芙蓉蕊。但愛芙蓉香。又種芙蓉子。不念閭門外。千里稻苗死。吳王心日侈。服翫盡奇瓊。身臥翠羽帳。手持紅玉盃。冠垂明月珠。帶束通天犀。行動自矜顧。數步一徘徊。小人知所好。懷寶四方來。奸邪得藉手。從此倖門開。古稱國之寶。穀米與賢才。今看君王眼。視之如塵灰。伍員諫已死。浮屍去不迴。姑蘇臺下草。麋鹿暗生麇。

宿紫閣山北村詩

晨遊紫閣峯。暮宿山下村。村老見予喜。爲予開一罇。舉盃未及飲。暴卒來入門。紫衣挾刀斧。草草十餘人。奪我席上酒。掣我盤中飧。主人退後立。斂手反如賓。庭中有奇樹。種來三十春。主人惜不得。持斧斷其根。口稱采造家。身屬神策軍。主人慎勿語。中尉正承恩。

讀漢書詩

禾黍與稂莠。雨來同日滋。桃李與荆棘。霜降同夜萎。草木既區別。榮枯那等夷。茫茫天地意。無乃太無私。小人與君子。用置各有宜。奈何西漢末。忠邪並信之。不然盡信忠。早絕邪臣窺。不然盡信邪。早使忠臣知。優游兩不斷。盛業日已衰。痛矣蕭京輩。終令陷禍機。每讀元成紀。憤憤令人悲。寄言爲國者。不得學天時。寄言爲臣者。可以鑑於斯。

贈樊著作詩

陽城爲諫議。以正事其君。其手如屈軼。舉必指佞臣。卒使不仁者。不得秉國鈞。元稹爲御史。以直立其身。其心如肺石。動必達窮民。東川八十家。冤憤一言伸。劉闢肆亂心。殺人正紛紛。其嫂曰庾氏。棄絕不爲親。從使萌逆節。隱心潛負恩。其佐曰孔戡。捨去不爲賓。凡此士與女。其道天下聞。常恐國史上。但記鳳與麟。賢者不爲名。名彰教乃敷。每惜若人輩。身死名亦淪。君爲著作郎。職廢志空存。雖有良史才。直筆無所申。何不自著書。實錄彼善人。編爲一家言。以備史闕文。

蜀路石婦詩

道傍一石婦。無記復無銘。傳是此鄉女。爲婦孝且貞。十五嫁邑人。十六夫征行。夫行一十載。婦獨守孤爨。其夫有父母。老病不安寧。其婦執婦道。一一如禮經。晨昏問起居。恭順發心誠。藥餌自調節。膳羞必甘馨。夫行竟不歸。婦德轉光明。後人高其節。刻石像婦形。儼然整衣巾。若立在閨庭。似見舅姑禮。如聞環珮聲。至今爲婦者。見此孝心生。不比山頭石。空有望夫名。

折劍頭詩

拾得折劍頭。不知折之由。一握青蛇尾。數寸碧峯頭。疑是斬鯨鯢。不然刺蛟虬。缺落泥土中。委棄無人收。我有鄙介性。好剛不好柔。勿輕直折劍。猶勝曲全鉤。

登樂遊園望詩

獨上樂遊園。四望天日曛。東北何瀟瀟。宮闕入烟雲。愛此高處立。忽如遺垢氛。耳目暫清曠。懷抱鬱不伸。下視十二街。綠樹間紅塵。車馬徒滿眼。不見心所親。孔生死洛陽。元九謫荆門。可憐南北路。高蓋者何人。

酬元九對新栽竹有懷見寄

昔我十年前。與君始相識。曾將秋竹竿。比君孤且直。中心一以合。外事紛無極。共保秋竹心。風霜侵不得。始嫌梧桐樹。秋至先改色。不愛楊柳枝。春來軟無力。憐君別我後。見竹長相憶。常欲在眼前。故栽庭戶側。分首今何處。君南我在北。吟我贈君詩。對之心惻惻。

感鶴詩

鶴有不羣者。飛飛在野田。飢不啄腐鼠。渴不飲盜泉。貞姿自耿介。雜鳥何翩跹。同遊不同志。如此十餘年。一與嗜欲念。遂爲矰繳牽。委質小池內。爭食羣雞前。不惟懷稻粱。兼亦競腥羶。不唯戀主人。兼亦狎鳥鳶。物心不可知。天性有時遷。一飽尚如此。況乘大夫軒。

春雪

元和歲在卯。六年春二月。月晦寒食天。天陰夜飛雪。連宵復竟日。浩浩殊未歇。大似落鵝毛。密如飄玉屑。

寒銷春茫茫。蒼氣變風凜冽。上林草盡沒。曲江冰復結。紅乾杏花死。綠凍楊枝折。所憐物性傷。非惜年芳絕。上天有時令。四序平分別。寒燠苟反常。物生皆天闕。我觀聖人意。魯史有其說。或記水不冰。或書霜不殺。上將儆正教。下以防災孽。茲雪今如何。信美非時節。

高僕射詩

富貴人所愛。聖人去其泰。所以致仕年。著在禮經內。玄元亦有訓。知止則不殆。二疏獨能行。遺跡東門外。清風久銷歇。迨此尚千載。斯人古亦稀。何況今之世。遑遑名利客。白首千百輩。唯有高僕射。七十懸車蓋。我年雖未老。歲月亦云邁。預恐耄及時。貪榮不能退。中心私自儆。何以爲我戒。故作僕射詩。書之於大帶。

白牡丹詩

和錢學士作

城中看花客。且暮走營營。素華人不顧。亦占牡丹名。閉在深寺中。車馬無來聲。唯有錢學士。盡日遶叢行。憐此皓然質。無人自芳馨。衆嫌我獨賞。移植在中庭。留光夜不暝。迎光曙先明。對之心亦靜。虛白相向生。唐昌玉蕊花。攀翫衆所爭。折來比顏色。一種如瑤瓊。彼因稀見貴。此以多爲輕。始知無正色。愛惡隨人情。豈惟花獨爾。理與人事并。君看入時者。紫豔與紅英。

贈內詩

生爲同室親。死爲同穴塵。他人尙相勉。而况我與君。黔婁固窮士。妻賢忘其貧。冀缺一農夫。妻敬儼如賓。陶潛不營生。習氏自爨薪。梁鴻不肯仕。孟光甘布裙。君雖不讀書。此事耳亦聞。至此千載後。傳是何如人。人生未死間。不能忘其身。所須者衣食。不過飽與溫。蔬食足充飢。何必膏粱珍。綰絮足禦寒。何必錦繡文。

君家有貽訓。清白遺子孫。我亦貞苦士。與君新結婚。庶保貧與素。偕老同欣欣。

寄唐生詩

賈誼哭時事。阮籍哭路歧。唐生今亦哭。異代同其悲。唐生者何人。五十寒且飢。不悲口無食。不悲身無衣。所悲忠與義。悲甚則哭之。太尉擊賊日。尙書叱盜時。大夫死兇寇。諫議謫蠻夷。每見如此事。聲發涕輒隨。往往聞其風。俗士猶或非。憐君頭半白。其志竟不衰。我亦君之徒。鬱鬱何所爲。不能發聲哭。轉作樂府詩。篇篇無空文。句句必盡規。功高虞人箴。痛甚騷人辭。非求宮律高。不務文字奇。惟歌生民病。願得天子知。未得天子知。甘受時人嗤。藥良氣味苦。瑟淡音聲稀。不懼權豪怒。亦任親朋譏。人竟無奈何。呼作狂男兒。每逢羣盜息。或遇雲霧披。但自高聲歌。庶幾天聽卑。歌哭雖異名。所感則同歸。寄君三十章。與君爲哭詞。

傷唐衢二首

自我心存道。外物少能逼。常排傷心事。不爲長歎息。忽聞唐衢死。不覺動顏色。悲端從東來。觸我心惻惻。伊昔未相知。偶遊滑臺側。同宿李翱家。一言如舊識。酒酣出送我。風雪黃河北。日西並馬頭。語別至昏黑。君歸向東鄭。我來遊上國。交心不交面。從此重相憶。憐君儒家子。不得時書力。五十著青衫。試官無祿食。遺文僅千首。六義無差忒。散在京華間。何人爲收得。

二

憶昨元和初。忝備諫官位。是時兵革後。生民正憔悴。但傷民病痛。不識時忌諱。遂作秦中吟。一吟悲一事。貴人皆怪怒。閑人亦非訾。天高未及聞。荆棘生滿地。唯有唐衢見。知我平生志。一讀興歎嗟。再吟垂涕泗。

因和三十韻。手題遠緘寄。致吾陳杜間。賞愛非常意。此人無復見。此詩尤可貴。今日開篋看。蠹魚損文字。不知何處葬。欲問先歔歔。終去哭墳前。還君一掬淚。

問友詩

種蘭不種艾。蘭生艾亦生。根莖相交長。莖葉相附榮。香莖與臭葉。日夜俱長大。鋤艾恐傷蘭。溉蘭恐滋艾。蘭亦未能溉。艾亦未能除。沈吟意不決。問君合何如。

悲哉行

悲哉爲儒者。力學不知疲。讀書眼欲暗。秉筆手生胝。十上方一第。成名常苦遲。縱有宦達者。兩鬢已成絲。可憐少壯日。適在窮賤時。丈夫老且病。焉用富貴爲。沉沉朱門宅。中有乳臭兒。狀貌如婦人。光明膏梁肌。手不把書卷。身不擐戎衣。二十襲封爵。門承勳戚資。春來日日出。服御何輕肥。朝從薄徒飲。暮有倡樓期。封錢還酒債。堆金選娥眉。聲色狗馬外。其餘一無知。山苗與澗松。地勢隨高卑。古來無奈何。非君獨傷悲。

紫藤詩

藤花紫蒙茸。藤葉青扶疏。誰謂好顏色。而爲害有餘。下如蛇屈盤。上若繩繫紆。可憐中間樹。束縛成枯株。柔蔓不自勝。嫋嫋挂空虛。豈知纏樹木。千夫力不如。先柔後爲害。有似諛佞徒。附著君權勢。君迷不肯誅。又如妖婦人。綢繆蠱其夫。可憐壞人室。夫惑不能除。寄言邦與家。所慎在其初。毫末不早辯。滋蔓信難圖。願以藤爲誡。銘之於座隅。

放鷹詩

十月鷹出籠。羣枯雉兔肥。下轉隨指顧。百擲無一遺。鷹翅疾如風。鷹爪利如錐。本爲鳥所設。今爲人所資。孰能使之然。有術甚易知。取其向背性。制在飢飽時。不可使長飽。不可使長飢。飢則力不足。飽則背人飛。乘飢縱搏擊。未飽須熟維。所以爪翅功。而人坐收之。聖明馭英雄。其術亦如斯。鄙語不可棄。吾聞諸獵師。

慈烏夜啼詩

慈烏失其母。啞啞吐哀音。晝夜不飛去。經年守故林。夜夜夜半啼。聞者爲沾襟。聲中如告訴。未盡反哺心。百鳥豈無母。爾獨哀怨深。應是母慈重。使爾悲不任。昔有吳起者。母歿喪不臨。嗟哉斯徒輩。其心不如禽。慈烏復慈烏。鳥中之曾參。

燕詩示劉叟

梁上有雙燕。翩翩雄與雌。銜泥兩椽間。一巢生四兒。四兒日夜長。索食聲孜孜。青蟲不易捕。黃口無飽期。鷲爪雖欲擊。心力不知疲。須臾十來往。猶恐巢中飢。辛勤三十日。母瘦雛漸肥。喃喃教言語。一一刷毛衣。一旦羽翼成。引上庭樹枝。舉翅不迴顧。隨風四散飛。雌雄空中鳴。聲盡呼不歸。却入空巢裏。啾啾終夜悲。燕燕爾勿悲。爾當返自思。思爾爲雛日。高飛背母時。當時父母念。今日爾應知。

采地黃者詩

麥死春不雨。禾損秋早霜。歲晏無口食。田中采地黃。采之將何用。持以易糲糧。凌晨荷鋤去。薄暮不盈筐。攜來朱門家。賣與白面郎。與君啖肥馬。可使照地光。願易馬殘粟。救此苦飢腸。

初入太行路詩

天冷日不光。太行峯蒼莽。嘗聞此中險。今我方獨往。馬蹄凍且滑。羊腸不可上。若比世路難。猶自平於掌。

鄧魴張徹落第詩

古琴無俗韻。奏罷無人聽。寒松無妖花。枝下無人行。春風十二街。軒騎不暫停。奔車看牡丹。走馬聽秦箏。衆目悅芳豔。松獨守其貞。衆耳喜鄭衛。琴亦不改聲。懷哉二夫子。念此無自輕。

送王處士詩

王門豈無酒。侯門豈無肉。主人貴且驕。待客禮不足。望塵而拜者。朝夕走碌碌。王生獨拂衣。遐舉如雲鶴。寧歸白雲外。飲水臥空谷。不能隨衆人。斂手低眉目。扣門與我別。沽酒留君宿。好去采薇人。終南山正綠。

村居苦寒詩

八年十二月五日雪紛紛。竹柏皆凍死。況彼無衣民。迴觀村閭閻。十室八九貧。北風利如劍。布絮不蔽身。唯燒蒿棘火。愁坐夜待晨。乃知大寒歲。農者尤苦辛。願我當此日。草堂深掩門。褐裘覆絁被。坐臥有餘溫。幸免飢凍苦。又無墮畝勤。念彼深可愧。自問是何人。

納粟詩

有吏夜扣門。高聲催納粟。家人不待曉。場上張燈燭。揚簸淨如珠。一車三十斛。猶憂納不中。鞭責及僮僕。昔余謫從事。內愧才不足。連授四命官。坐尸十年碌。常聞古人語。損益周必復。今日諒甘心。還他太倉穀。

薛中丞詩

百人無一直。百直無一遇。借問遇者誰。正人行得路。中丞薛存誠。守直心甚固。臯明燭如日。再使乘王度。

奸豪與佞巧，非不憎且懼。直道漸光明，邪謀難蓋覆。每因匪躬節，知有匡時具。張爲墜網綱，倚作頹簷柱。悠哉上天意，報施紛迴互。自古已冥茫，從今尤不諭。豈與小人意，昏然同好惡。不然君子人，何反如朝露。襄相昨已失，薛君今又去。以我惜賢心，五年如旦暮。况聞善人命，長短繫運數。今我一涕零，豈爲中丞故。

秋池二首

前池秋始半，卉物多摧壞。欲暮槿先萎，未霜荷已敗。默然有所感，可以從茲誠。本不種松筠，早凋何足怪。鑿池貯秋水，中有蘋與芰。天旱水暗銷，場然委空地。有似汎汎者，附麗權與貴。一旦恩勢移，相隨共憔悴。

夏旱詩

太陰不離畢，太歲仍在午。旱日與炎風，枯爍我田畝。金石欲銷鑠，況茲禾與黍。嗷嗷萬族中，唯農最辛苦。惘然望歲者，出門何所覩。但見棘與茨，羅生徧場圃。惡苗承沴氣，欣然得其所。感此因問天，可能長不雨。

諭友詩

昨夜霜一降，殺君庭中槐。乾葉不待黃，索索飛下來。憐君感節物，晨起步前階。臨風踏葉立，半日顏色衰。西望長安城，歌鍾十二街。何人不歡樂，君獨心悠哉。白日頭上走，朱顏鏡中頽。平生青雲心，銷化成死灰。我今贈一言，勝飲酒千盃。其言雖甚鄙，可破悒悒懷。朱門有勳賢，陋巷有顏回。窮通各問命，不繫才不才。推此自豁豁，不必待安排。

丘中有一士 命首句爲題二首

丘中有一士，不知其姓名。面色不憂苦，血氣常和平。每選隙地居，不踏要路行。舉動無尤悔，物莫與之爭。

藜藿不充腸。布褐不蔽形。終歲守窮餓。而無嗟歎聲。豈是愛貧賤。深知時俗情。勿矜羅弋巧。鸞鶴在冥冥。丘中有一士。守道歲月深。行披帶索衣。坐拍無絃琴。不飲濁泉水。不息曲木陰。所逢苟非義。糞土于黃金。鄉人化其風。薰如蘭在林。智愚與強弱。不忍相欺侵。我欲訪其人。將行復沈吟。何必見其面。但在學其心。

新製布裘詩

桂布白似雪。吳綿軟於雲。布重綿且厚。爲裘有餘溫。朝擁坐至暮。夜覆眠達晨。誰知嚴冬月。支體暖如春。中夕忽有念。撫裘起逡巡。丈夫貴兼濟。豈獨善一身。安得萬里裘。蓋裏周四垠。穩暖皆如我。天下無寒人。

杏園中棗樹詩

人言百果中。唯棗凡且鄙。皮皴似龜手。葉小如鼠耳。胡爲不自知。生花此園裏。豈宜遇攀翫。幸免遭傷毀。二月曲江頭。雜英紅旖旎。棗亦在其間。如嫫對西子。東風不擇木。吹煦長未已。眼看欲合抱。得盡生生理。寄言遊春客。乞君一迴視。君愛繞指柔。從君憐柳杞。君求悅目豔。不敢爭桃李。君若作大車。輪軸材須此。

蝦蟆詩 和張十六

嘉魚薦宗朝。靈龜貢邦家。應龍能致雨。潤我百穀牙。蠢蠢水族中。無用者蝦蟆。形穢肌肉腥。出沒于泥沙。六月七月交。時雨正滂沱。蝦蟆得其志。快樂無以加。地既蕃其生。使之族類多。天又與其聲。得以相誼諱。豈唯玉池上。汚君清冷波。可獨瑤瑟前。亂君鹿鳴歌。常恐飛上天。跳躍隨姮娥。往往蝕明月。遣君無奈何。

寄隱者

賣藥向都城。行憩青門樹。道逢馳驛者。色有非常懼。親族走相送。欲別不敢住。私怪問道旁。何人復何故。

云是右丞相。當國握樞務。祿厚食萬錢。恩深日三顧。昨日延英對。今日崖州去。由來君臣間。寵辱在朝暮。青青東郊草。中有歸山路。歸去臥雲人。謀身計非誤。

放魚 自此後詩到江州作

曉日提竹籃。家童買春蔬。青青芹蕨下。疊臥雙白魚。無聲但呀呀。以氣相煦濡。傾籃寫地上。拔刺長尺餘。豈唯刀机憂。坐見螻蟻圖。脫泉雖已久。得水猶可蘇。放之小池中。且用救乾枯。水小池窄狹。動尾觸四隅。一時幸苟活。久遠將何如。憐其不得所。移放於南湖。南湖連西江。好去勿踟蹰。施恩卽望報。吾非斯人徒。不須泥沙底。辛苦覓明珠。

文柏牀

陵上有老柏。柯葉寒蒼蒼。朝爲風烟樹。暮爲宴寢牀。以其多奇文。宜升君子堂。剗削露節目。拂拭生輝光。玄班狀狸首。素質如截肪。雖充悅目翫。終乏周身防。華彩誠可愛。生理苦已傷。方知自殘者。爲有好文章。

潯陽三題 并序

廬山多桂樹。湓浦多脩竹。東林寺有白蓮華。皆植物之貞勁秀異者。雖宮園省寺中未必能盡有。夫物以多爲賤。故南方人不貴重之。至有蒸爨其桂。翦棄其竹。白眼於蓮花者。予惜其不生於北土也。因賦三題以唁之。

廬山桂

偃蹇月中桂。結根依青天。天風繞月起。吹子下人間。飄零委何處。乃落匡廬山。生爲石上桂。葉如翦碧鮮。

枝幹日長大。根發日牢堅。不歸天上月。空老山中年。廬山去咸陽。道里三四千。無人爲移植。得入上林園。不及紅花樹。長栽溫室前。

濫浦竹

潯陽十月天。天氣仍溫燠。有霜不殺草。有風不落木。玄冥氣力薄。草木冬猶綠。誰肯濫浦頭。迴眼看脩竹。其有願舛者。持刀斬且束。剖劈青琅玕。家家蓋牆屋。吾聞汾晉間。竹少重如玉。胡爲取輕賤。生此西江曲。

東林寺白蓮

東林北塘水。瀟瀟見底清。中生白芙蓉。菌萑三百莖。白日發光彩。清飈散芳馨。洩香銀囊破。瀉露玉盤傾。我慚塵垢眼。見此瓊瑤英。乃知紅蓮華。虛得清淨名。夏萼敷未歇。秋房結纒成。夜深衆僧寢。獨起繞池行。欲收一顆子。寄向長安城。但恐出山去。人間種不生。

大水

潯陽郊郭闌。大水歲一至。閭閻半漂蕩。城堞多傾墜。蒼茫生海色。渺漫連空翠。風卷白波翻。日煎紅浪沸。工商徹屋去。牛馬登山避。况當率稅時。頗害農桑事。獨有備舟子。鼓櫂生意氣。不知萬人災。自覓錐刀利。吾無奈爾何。爾非久得志。九月霜降後。水涸爲平地。

卷二

諷諭二 古調詩五言 凡五十八首

續古詩十首

戚戚復戚戚。送君遠行役。行役非中原。海外黃沙磧。伶俜獨居妾。迢遞長征客。君望功名歸。妾憂生死隔。誰家無夫婦。何人不離析。所恨薄命身。嫁遲別日迫。妾身有存歿。妾心無改易。生作閨中婦。死作山頭石。掩淚別鄉里。飄飄將遠行。茫茫綠野中。春盡孤客情。驅馬上丘壠。高低路不平。風吹棠梨花。啼鳥時一聲。古墓何代人。不知姓與名。化作路傍土。年年春草生。感彼忽自悟。今我何營營。

朝采山上薇。暮采山上薇。歲晏薇亦盡。飢來何所爲。坐飲白石水。手把青松枝。擊節獨長歌。其聲清且悲。櫪馬非不肥。所苦長縶維。豢豕非不飽。所憂竟爲犧。行行歌此曲。以慰常苦飢。雨露長纖草。山苗高入雲。風雪折勁木。澗松摧爲薪。風摧此何意。雨長彼何因。百丈澗底死。寸莖山上春。可憐苦節士。感此涕盈巾。

窈窕雙鬢女。容德俱如玉。晝居不踰闕。夜行常秉燭。氣如含露蘭。心如貫霜竹。宜當備嬪御。胡爲守幽獨。無媒不得選。年忽過三六。歲暮望漢宮。誰在黃金屋。邯鄲進倡女。能唱黃花曲。一曲稱君心。恩榮連九族。栖栖遠方士。讀書三十年。業成無知己。徒步來入關。長安多王侯。英俊競攀援。幸隨衆賓末。得廁門館間。東閣有旨酒。中堂有管絃。何爲向隅客。對此不開顏。富貴無是非。主人終日歎。貧賤多悔尤。客子中夜嘆。歸去復歸去。故鄉貧亦安。

涼風飄嘉樹。日夜減芳華。下有感秋婦。攀條苦悲嗟。我本幽閒女。結髮事豪家。豪家多婢僕。門內頗驕奢。良人近封侯。出入鳴玉珂。自從富貴來。恩薄讒言多。冢婦獨守禮。羣妾互奇表。但信言有玷。不察心無瑕。

容光未銷歇。歡愛忽蹉跎。何意掌上玉。化爲眼中砂。盈盈一尺水。浩浩千丈河。勿言小大異。隨分有風波。閨房猶復爾。邦國當如何。

心亦無所迫。身亦無所拘。何爲腸中氣。鬱鬱不得舒。不舒良有以。同心久離居。五年不見面。三年不得書。念此令人老。抱膝坐長吁。豈無盈樽酒。非君誰與娛。

攬衣出門行。遊觀遠林渠。澹澹春水暖。東風生綠蒲。上有和鳴鴈。下有掉尾魚。飛沉一何樂。鱗羽各有徒。而我方獨處。不與之子俱。顧彼自傷己。禽魚之不如。出遊欲遣憂。孰知憂有餘。

春日日出。瞳瞳耀晨輝。草木照未遠。浮雲已蔽之。天地黯以晦。當午如昏時。雖有東南風。力微不能吹。中園何所有。滿地青青葵。陽光委雲上。傾心欲何依。

秦中吟十首 并序

貞元元和之際。予在長安。聞見之間。有足悲者。因直歌其事。命爲秦中吟。

議婚

天下無正聲。悅耳卽爲娛。人間無正色。悅目卽爲姝。顏色非相遠。貧富則有殊。貧爲時所棄。富爲時所趨。紅樓富家女。金縷繡羅襦。見人不斂手。嬌癡二八初。母兄未開口。已嫁不須臾。綠窗貧家女。寂寞二十餘。荆釵不直錢。衣上無真珠。幾迴人欲聘。臨日又踟躕。主人會良媒。置酒滿玉壺。四座且勿飲。聽我歌兩途。富家女易嫁。嫁早輕其夫。貧家女難嫁。嫁晚孝於姑。聞君欲娶婦。娶婦意何如。

重賦

厚地植桑麻。所要濟生民。生民理布帛。所求活一身。身外充征賦。上以奉君親。國家定兩稅。本意在憂人。厥初防其淫。明勅內外臣。稅外加一物。皆以枉法論。奈何歲月久。貪吏得因循。浚我以求寵。斂索無冬春。織綰未成疋。纒絲未盈斤。里胥迫我納。不許暫逡巡。歲暮天地閉。陰風生破村。夜深烟火盡。霰雪白紛紛。幼者形不蔽。老者體無溫。悲端與寒氣。併入鼻中辛。時日輸殘稅。因窺官庫門。綰帛如山積。絲絮似雲屯。號爲羨餘物。隨月獻至尊。奪我身上煖。買爾眼前恩。進入瓊林庫。歲久化爲塵。

傷宅

誰家起甲第。朱門大道邊。豐屋中櫛比。高牆外迴環。累累六七堂。棟宇相連延。一堂費百萬。鬱鬱起青烟。洞房溫且清。寒暑不能忤。高堂虛且迴。坐臥見南山。繞廊紫藤架。夾砌紅藥欄。攀枝摘桃櫻。帶花移牡丹。主人此中坐。十載爲大官。廚有臭敗肉。庫有貫朽錢。誰能將我語。問爾骨肉間。豈無窮賤者。忍不救飢寒。如何奉一身。直欲保千年。不見馬家宅。今作奉誠園。

傷友

陋巷孤寒士。出門苦恓恓。雖云志氣在。豈免顏色低。平生同門友。通籍在金闈。曩者膠漆契。邇來雲雨睽。正逢下朝歸。軒騎五門西。是時天久陰。三日雨淒淒。蹇驢避路立。肥馬當風嘶。迴頭忘相識。占道上沙堤。昔年洛陽社。貧賤相提攜。今日長安道。對面隔雲泥。近日如多此。非君獨慘悽。死生不變者。唯聞任與黎。不致任。

七十而致仕。禮法有明文。何乃貪榮者。斯言如不聞。可憐八九十。齒墮雙眸昏。朝露貪名利。夕陽憂子孫。

挂冠願翠綵。懸車惜朱輪。金章腰不勝。僮僕入君門。誰不愛富貴。誰不戀君恩。年高須請老。名遂合退身。少時共嗤誚。晚歲多因循。賢哉漢二疏。彼獨是何人。寂寞東門路。無人繼去塵。

立碑

動德既下衰。文章亦陵夷。但見山中石。立作路傍碑。銘勳悉太公。敘德皆仲尼。復以多爲貴。千言直萬費。爲文彼何人。想見筆下時。但欲愚者悅。不思賢者嗤。豈獨賢者嗤。仍傳後代疑。古石蒼苔字。安知是愧詞。我聞望江縣。麴令撫惇嫠。在官有仁政。名不聞京師。身歿欲歸葬。百姓遮路歧。攀轅不得歸。留葬此江湄。至今道其名。男女涕皆垂。無人立碑碣。唯有邑人知。

輕肥

意氣驕滿路。鞍馬光照塵。借問何爲者。人稱是內臣。朱紱皆大夫。紫綬或將軍。誇赴軍中宴。走馬去如雲。罇罍溢九醞。水陸羅八珍。果擘洞庭橘。鱠切天池鱗。食飽心自若。酒酣氣益振。是歲江南旱。衢州人食人。

五絃

清歌且罷唱。紅袂亦停舞。趙叟抱五絃。宛轉當胸撫。大聲粗若散。颯颯風和雨。小聲細欲絕。切切鬼神語。又如鵲報喜。轉作猿啼苦。十指無定音。顛倒宮徵羽。坐客聞此聲。形神若無主。行客聞此聲。駐足不能舉。嗟嗟俗人耳。好今不好古。所以綠窗琴。日日生塵土。

歌舞

秦中歲云暮。大雪滿皇州。雪中退朝者。朱紫盡公侯。貴有風雲興。富無飢寒憂。所營唯第宅。所務在追遊。

朱輪車馬客。紅燭歌舞樓。歡酣促密坐。醉暖脫重裘。秋官爲主人。庭尉居上頭。日中一爲樂。夜半不能休。豈知闕鄉獄。中有凍死囚。

買花

帝城春欲暮。喧喧車馬度。共道牡丹時。相隨買花去。貴賤無常價。酬直看花數。灼灼百朵紅。淺淺五束素。上張幄幕庇。傍織巴籬護。水洒復泥封。移來色如故。家家習爲俗。人人迷不悟。有一田舍翁。偶來買花處。低頭獨長歎。此歎無人諭。一叢深花色。十戶中人賦。

贈友詩五首 并序

吾友有王佐之才者。以致君濟人爲己任。識者深許之。因贈是詩。以廣其志云。

一年十二月。每月有常令。君出臣奉行。謂之握金鏡。由茲六氣順。以遂萬物性。時令一反常。生靈受其病。周漢德下衰。王風始不競。又從斬晁錯。諸侯益強盛。百里不同禁。四時自爲政。盛夏興土功。方春剽人命。誰能救其失。待君佐邦柄。峨峨象魏門。懸法彙倫正。

銀生楚山曲。金生鄱溪濱。南人棄農業。求之多苦辛。披砂復鑿石。屹屹無冬春。手足盡皴胝。愛利不愛身。畚田旣慵斫。稻田亦懶耘。相攜作游手。皆道求金銀。畢竟金與銀。何殊泥與塵。且非衣食物。不濟飢寒人。棄本以趨末。日富而歲貧。所以先聖王。棄藏不爲珍。誰能反古風。待君秉國鈞。捐金復抵璧。勿使勞生民。私家無錢鑪。平地無銅山。胡爲秋夏稅。歲歲輸銅錢。錢力日已重。農力日已殫。賤糶粟與麥。賤買絲與綿。歲暮衣食盡。焉得無飢寒。吾聞國之初。有制垂不刊。傭必算丁口。租必計桑田。不求土所無。不強人所難。

量入以爲出。上足下亦安。兵興一變法。兵息遂不還。使我農桑人。顛頓畎畝間。誰能革此弊。待君秉利權。復彼租傭法。令如貞觀年。

京師四方則。王化之本根。長吏久於政。然後風教敦。如何尹京者。選次不遽巡。諸君屈指數。十年十五人。科條日相矯。吏力亦以勤。寬猛政不一。民心安得淳。九州雍爲首。羣牧之所遵。天下率如此。何以安吾民。誰能變此法。待君贊彌綸。慎擇循良吏。令其長子孫。三十男有室。二十女有歸。近代多離亂。婚姻多過期。嫁娶既不早。生育常苦遲。兒女未成人。父母已衰羸。凡人貴達日。多在長大時。欲報親不待。孝心無所施。哀哉三牲養。少得及庭闈。惜哉萬鍾粟。多用飽妻兒。誰能正婚禮。待君張國維。庶使孝子心。皆無風樹悲。

寓意詩五首

豫樟生深山。七年而後知。挺高二百尺。本末皆十圍。天子建明堂。此材獨中規。匠人執斤墨。采度將有期。孟冬草木枯。烈火燎山陂。疾風吹猛焰。從根燒到枝。養材三十年。方成棟梁姿。一朝爲灰燼。柯葉無子遺。地雖生爾材。天不與爾時。不如糞上英。猶有人掇之。已矣勿重陳。重陳令人悲。不悲焚燒苦。但悲採用遲。赫赫京內史。炎炎中書郎。昨傳徵拜日。恩賜頗殊常。貂冠水蒼玉。紫綬黃金章。佩服身未暖。已聞竄遐荒。親戚不得別。吞聲泣路傍。賓客亦已散。門前雀羅張。富貴來不久。倏如瓦溝霜。權勢去尤速。譬若石火光。不如守貧賤。貧賤可久長。傳語宦遊子。且來歸故鄉。促織不成章。提壺但聞聲。嗟哉蟲與鳥。無實有虛名。與君定交日。久要如弟兄。何以示誠信。白水指爲盟。

雲雨一爲別。飛沉兩難并。君爲得風鵬。我爲失水鯨。音信日已疏。恩分日已輕。窮通尚如此。何況死與生。乃知擇交難。須有知人明。莫將山下松。結託水上萍。翩翩兩玄鳥。本是同巢燕。分飛來幾時。秋夏炎涼變。一宿蓬華廬。一栖明光殿。偶因銜泥處。復得重相見。彼矜杏梁貴。此嗟茅棟賤。眼看秋社至。兩處俱難戀。所託各暫時。胡爲相歎羨。婆娑園中樹。根株大合圍。蠹爾樹間蟲。形質一何微。誰謂蟲至微。蠹蠹無已期。孰謂樹至大。花葉有衰時。花衰夏未實。葉病秋先萎。樹心半爲土。觀者安得知。借問蟲何在。在身不在枝。借問蟲何食。食心不食皮。豈無啄木鳥。當長將何爲。

讀史詩五首

楚懷放靈均。國政亦荒淫。彷徨未忍決。遶澤行悲吟。漢文疑賈生。謫置湘之陰。是時刑方措。此去難爲心。士生一代間。誰不有浮沈。良時真可惜。亂世何足欽。乃知汨羅恨。未抵長沙深。禍患如棼絲。其來無端緒。馬遷下蠶室。嵇康就囹圄。抱冤志氣屈。忍恥形神沮。當彼戮辱時。奮飛無翅羽。商山有黃綺。潁川有巢許。何不從之遊。超然離網罟。山林少羈鞅。世路多艱阻。寄謝伐檀人。慎勿嗟窮處。漢日大將軍。少爲乞食子。秦時故列侯。老作鋤瓜士。春華何曄曄。園中發桃李。秋風忽蕭條。堂上生荆枳。深谷變爲岸。桑田成海水。勢去未須悲。時來何足喜。寄言榮枯者。反覆殊未已。含沙射人影。雖病人不知。巧言搆人罪。至死人不疑。掇蜂殺愛子。掩鼻戮寵姬。弘恭陷蕭望。趙高謀李斯。陰德旣必報。陰禍豈虛施。人事雖可罔。天道終難欺。明則有刑辟。幽則有神祇。苟免勿私喜。鬼得而誅之。

季子憔悴時。婦見不下機。買臣負薪日。妻亦棄如遺。一朝黃金多。佩印衣錦歸。去妻不敢視。婦嫂強依依。富貴家人重。貧賤妻子欺。奈何貧富間。可移親愛志。遂使中人心。汲汲求富貴。又令下人力。各競錐刀利。隨分歸舍來。一取妻孥意。

和答詩十首 并序

五年春。微之從東臺來。不數日。又左轉爲江陵士曹掾。詔下日。會予下內直歸。而微之已卽路。邂逅相遇於街衢中。自永壽寺南。抵新昌里北。得馬上語別。語不過相勉。保方寸。外形骸而已。因不暇及他。是夕足下次於山北寺。僕職役不得去。命季弟送行。且奉新詩一軸。致於執事。凡二十章。率有興比。淫文豔韻。無一字焉。意者欲足下在途諷讀。且以遣日時。銷憂懣。又有以張直氣而扶壯心也。及足下到江陵。寄在路所爲詩十七章。凡五六千言。言有爲。章有旨。迨於宮律體裁。皆得作者風。發緘開卷。且喜且怪。僕思牛僧孺戒不能示他人。唯與杓直拒非及樊宗師輩三四人時一吟讀。心甚貴重。然竊思之。豈僕所奉者二十章。遽能開足下聰明。使之然耶。抑又不知足下是行也。天將屈足下之道。激足下之心。使感時發憤而臻於此耶。若兩不然者。何立意措辭與足下前時詩如此之相遠也。僕旣羨足下詩。又憐足下心。盡欲引狂簡而和之。屬直宿拘牽。居無暇日。故不卽時如意。旬月來多乞病假。假中稍閒。且摘卷中尤者。繼成十章。亦不下三千言。其間所見同者固不能自異。異者亦不能強同。同者謂之和。異者謂之答。并別錄和夢遊春詩一章。各附於本篇之末。餘未和者亦續致之。頃者在科試間。常與足下同筆硯。每下筆時。輒相顧語。患其意太切而理太周。故理太周則辭繁。意太切則言激。然與足下爲文。所長在於此。所病亦在於此。足

下來序。果有詞犯文繁之說。今僕所和者猶前病也。待與足下相見日。各引所作。稍刪其煩而晦其義焉。餘具書白。

和思歸樂詩

山中獨栖鳥。夜半聲嚶嚶。似道思歸樂。行人掩泣聽。皆疑此山路。遷客多南征。憂憤氣不散。結化爲精靈。我謂此山鳥。本不因人生。人心自懷土。想作思歸鳴。孟嘗平居時。娛耳琴泠泠。雍門一言感。未奏淚沾纓。魏武銅雀妓。日與歡樂并。一旦西陵望。欲歌先涕零。峽猿亦無意。隴水復何情。爲入愁人耳。皆爲腸斷聲。請看元侍御。亦宿此郵亭。因聽思歸鳥。神氣獨安寧。問君何以然。道勝心自平。雖爲南遷客。如在長安城。云得此道來。何慮復何營。窮達有前定。憂喜無交爭。所以事君日。持憲立天庭。雖有迴天力。撓之終不傾。況始三十餘。年少有直名。心中志氣大。眼前爵祿輕。君恩若雨露。君威若雷霆。退不苟免難。進不曲求榮。在火辨玉性。經霜識松貞。展禽任三黜。靈均長獨醒。獲戾自東洛。貶官向南荆。再拜辭闕下。長揖別公卿。荊州又非遠。驛路半月程。漢水照天碧。楚山插雲青。江陵橘似珠。宜城酒如餚。誰謂謫去。未妨遊賞行。人生百歲內。天地暫寓形。太倉一稊米。大海一浮萍。身委逍遙篇。心付頭陀經。尙達生死觀。寧爲寵辱驚。中懷苟有主。外物安能縈。任意思歸樂。聲聲啼到明。

和陽城驛詩

商山陽城驛。中有嘆者誰。云是元監察。江陵謫去時。忽見此驛名。良久涕欲垂。何故陽道州。名姓同於斯。憐君一寸心。寵辱誓不移。疾惡若巷伯。好賢如緇衣。沉吟不能去。意者欲改爲。改爲避賢驛。大署於門楣。

荆人愛羊祜。戶曹改爲辭。一字不忍道。况兼姓呼之。因題八百言。言直文甚奇。詩成寄與我。鏘若金和絲。上言陽公行。友悌無等夷。骨肉同衾裯。至死不相離。次言陽公迹。夏邑始棲遲。鄉人化其風。少長皆孝慈。次言陽公道。終日對酒卮。兄弟笑相顧。醉貌紅怡怡。次言陽公節。審審居諫司。誓心除國蠹。決死犯天威。終言陽公命。左遷天一涯。道州炎瘴地。身不得生歸。一一皆實錄。事事無子遺。凡是爲善者。聞之惻然悲。道州旣已矣。往者不可追。何世無其人。來者亦可思。願以君子文。告彼大樂師。附於雅歌末。奏之白玉墀。天子聞此章。教化如法施。直諫從如流。佞臣惡如疵。宰相聞此章。政柄端正持。進賢不知倦。去邪勿復疑。憲臣聞此章。不敢懷依違。諫官聞此章。不忍縱詭隨。然後告史氏。舊史有前規。若作陽公傳。欲令後世知。不勞敍世家。不用費文辭。但於國史上。全錄元稹詩。

答桐花詩

山木多蒼鬱。茲桐獨亭亭。葉重碧雲片。花蔭紫霞英。是時三月天。春暖山雨晴。夜色向月淺。暗香隨風輕。行者多商賈。居者悉黎氓。無人解賞愛。有客獨屏營。手攀花枝立。足踏花影行。生憐不得所。死欲揚其聲。截爲天子琴。刻作古人形。云待我成器。薦之於穆清。賊是君子心。恐非草木情。胡爲愛其華。而反傷其生。老龜被刳腸。不如無神靈。雄雞自斷尾。不願爲犧牲。況此好顏色。花紫葉青青。宜遂天地性。忍加刀斧刑。我思五丁力。拔入九重城。當君正殿栽。花葉生光晶。上對月中桂。下覆階前甍。汎拂香爐煙。隱映斧藻屏。爲君布綠陰。當暑蔭軒楹。沈沈綠滿地。桃李不敢爭。爲君發清韻。風來如叩瓊。泠泠聲滿耳。鄭衛不足聽。受君封植力。不獨吐芬馨。助君行春令。開花應清明。受君雨露恩。不獨含芳榮。戒君無戲言。翦葉封弟兄。

受君歲月功。不獨資生成。爲君長高枝。鳳凰上頭鳴。一鳴君萬歲。壽如山不傾。再鳴萬人泰。泰階爲之平。如何有此用。幽滯在巖坳。歲月不爾駐。孤芳坐凋零。請向桐枝上。爲余題姓名。待余有勢力。移爾獻丹庭。

和大芻鳥詩

鳥者種有二名。同性不同。芻小者慈孝。芻大者貪庸。芻大命又長。生來十餘冬。物老顏色變。頭毛白茸茸。飛來庭樹上。初但驚兒童。老巫生姦計。與鳥意潛通。云此非凡鳥。遙見起敬恭。千歲乃一出。喜賀主人翁。祥瑞來白日。神聖占知風。陰作北斗使。能爲人吉凶。此鳥所止家。家產日夜豐。上以致壽考。下可宜田農。主人富家子。身老心童蒙。隨巫拜復祝。婦姑亦相從。殺雞薦其肉。敬若禮六宗。鳥喜張大芻。飛接在虛空。鳥旣飽臚腥。巫亦饜甘濃。鳥巫互相利。不復兩西東。日日營巢窟。稍稍近房櫳。雖生八九子。誰辨其雌雄。羣雛又成長。衆芻騁殘兇。探巢吞燕卵。入蔕啄蠶蟲。豈無乘秋隼。羈絆委高墉。但食烏殘肉。無施搏擊功。亦有能言鸚。翅碧背距紅。暫曾說鳥罪。囚閉在深籠。青青窗前柳。鬱鬱井上桐。貪鳥占栖息。慈鳥獨不容。慈鳥爾奚爲。來往何憧憧。曉去先晨鼓。暮歸後昏鍾。辛苦塵土間。飛啄禾黍叢。得食將哺母。飢腸不自充。主人憎慈鳥。命子削彈弓。絃續會稽竹。丸鑄荆山銅。慈鳥求母食。飛下爾庭中。數粒未入口。一九已中胸。仰天號一聲。似欲訴蒼穹。反哺日未足。非是惜微躬。誰能持此冤。一爲問化工。胡然大芻鳥。竟得大年終。

答四皓廟詩

天下有道見。無道卷懷之。此乃聖人語。吾聞諸仲尼。矯矯四先生。同稟希世資。隨時有顯晦。秉道無磷緇。秦皇肆暴虐。二世遘亂離。先生相隨去。商嶺采紫芝。君看秦獄中。戮辱者李斯。劉項爭天下。謀臣競悅隨。

先生如鸞鶴。去入冥冥飛。君看齊鼎中。燦爛者鄙其子房。得沛公。自謂相遇遲。八難掉舌樞。三略役心機。辛苦十數年。晝夜形神疲。竟雜霸者道。徒稱帝者師。子房爾則能。此非吾所宜。漢高之季年。嬖寵鍾所私。家嫡欲廢奪。骨肉相疑疑。豈無子房口。口舌無所施。亦有陳平心。心計將何爲。皤皤四先生。高冠危映眉。從容下南山。顧眄入東闈。前瞻惠太子。左右生羽儀。却顧戚夫人。楚舞無光輝。心不畫一計。口不吐一詞。暗定天下本。遂安劉氏危。子房吾則能。此非爾所知。先生道既光。太子禮甚卑。安車留不住。功成棄如遺。如彼旱天雲。一雨百穀滋。澤則在天下。雲復歸希夷。勿尚呂與伊。巢由往不返。伊呂去不歸。豈知四先生。出處兩逶迤。何必長隱逸。何必長濟時。由來聖人道。無朕不可窺。卷之不盈握。舒之亘八陲。先生道甚明。夫子猶或非。願子辨其惑。爲予吟此詩。

和雉媒詩

吟君雉媒什。一哂復一歎。知之一何晚。今日乃成篇。豈唯鳥有之。抑亦人復然。張陳刎頸交。竟以勢不完。至今不平氣。塞絕流水源。趙衰骨肉親。亦以利相殘。至今不善名。高於磨笄山。况此籠中雉。志在飲啄間。稻粱暫入口。性已隨人遷。身苦亦自忘。同族何足言。但恨爲媒拙。不足以自全。勸君今日後。養鳥養青鸞。青鸞一失侶。至死守孤單。勸君今日後。結客結任安。主人賓客去。獨住在門闈。

和松樹詩

亭亭山上松。一一生朝陽。森聳上參天。柯條百尺長。漠漠塵中槐。兩兩夾康莊。娑娑低覆地。枝幹亦尋常。八月白露降。槐葉次第黃。歲暮滿山雪。松色鬱蒼蒼。彼如君子心。秉操貫冰霜。此如小人面。變態隨炎涼。

共知松勝槐。誠欲栽道傍。糞土種瑤草。瑤草終不芳。尚可以斧斤。伐之爲棟梁。殺身獲其所。爲君搆明堂。不然終天年。老死在南岡。不願亞枝葉。低隨槐樹行。

答箭鏃詩

矢人職司憂。爲箭恐不精。精在利其鏃。錯磨鋒鏑成。插以青竹箨。羽之赤鴈翎。勿言分寸鐵。爲用乃長兵。聞有狗盜者。晝伏夜潛行。摩弓拭箭鏃。夜射不待明。一盜旣流血。百犬同吠聲。狺狺嗥不已。主人爲之驚。盜心憎主人。主人不知情。反責鏃太利。矢人獲罪名。寄言控弦者。願君少留聽。何不向西射。西天有狼星。何不向東射。東海有長鯨。不然學仁貴。三矢平虜庭。不然學仲連。一發下遼城。胡爲射小盜。此用無乃輕。徒沾一點血。虛汗箭頭腥。

和古社詩

廢村多年樹。生在古社隈。爲作妖狐窟。心空身未摧。妖狐變美女。社樹成樓臺。黃昏行人過。見者心徘徊。飢鷗竟不捉。老犬反爲媒。歲媚少年客。十去九不迴。昨夜雲雨合。烈風驅迅雷。風拔樹根出。雷霹社壇開。飛電化爲火。妖狐燒作灰。天明至其所。清曠無氛埃。舊地葺村落。新田闢荒萊。始知天降火。不必常爲災。勿謂神默默。勿謂天恢恢。勿喜犬不補。勿誇鷗不猜。寄言狐媚者。天火有時來。

和分水嶺詩

高嶺峻稜稜。細泉流甕甕。勢分合不得。東西隨所委。悠悠草蔓底。濺濺石罅裏。分流來幾年。晝夜兩如此。朝宗遠不及。去海三千里。浸潤小無功。山苗長旱死。縈紆用無所。奔迫流不已。唯作嗚咽聲。夜入行人耳。

有源殊不竭。無坎終難至。同出而異流。君看何所似。有似骨肉親。派別從茲始。又似勢利交。波瀾相背起。所以贈君詩。將君何所比。不比山上泉。比君井中水。

有木詩八首 并序

余讀漢書列傳。見佞順嬖媚。圖身忘國。如張禹輩者。見感上壘下。交亂君親。如江充輩者。見暴很跋扈。壅君樹黨。如梁冀輩者。見色仁行遠。先德後賊。如王莽輩者。又見外狀恢弘。中無實用者。又見附麗權勢。隨之覆亡者。其初皆有動人之才。足以惑衆媚主。莫不合於始而敗於終也。因引風人騷人之興。賦有木八章。不獨諷前人。欲倣後代爾。

有木名弱柳。結根近清池。風烟借顏色。雨露助華滋。峨峨白雪花。嫋嫋青絲枝。漸密陰自庇。轉高梢四垂。截枝扶爲杖。軟弱不自持。折條用樊圃。柔脆非其宜。爲樹信可翫。論材何所施。可惜金堤地。栽之徒爾爲。有木名櫻桃。得地早滋茂。葉密獨承日。花繁偏受露。迎風暗搖動。引鳥潛來去。鳥啄子難成。風來枝莫住。低軟易攀翫。佳人屢迴顧。色求桃李饒。心向松筠妬。好是映牆花。本非當軒樹。所以姓蕭人。曾爲代櫻賦。有木秋不凋。青青在江北。謂爲洞庭橘。美人自移植。上受顧盼恩。下勤澆溉力。實成乃是枳。臭苦不堪食。物有似是者。眞僞何由識。美人默無言。對之長歎息。中含害物意。外矯凌霜色。仍向枝葉間。潛生刺如棘。有木名杜梨。陰森覆丘壑。心蠶已空朽。根深尙盤礴。狐媚言語巧。妖鳥聲音惡。憑此爲巢穴。往來互棲託。四傍五六本。葉枝相交錯。借問因何生。秋風吹子落。爲長社壇下。無人敢芟斫。幾度野火來。風迴燒不着。有木香萋萋。山頭生一發。主人不知名。移種近軒闥。愛其有芳味。因以調麴藥。前後曾飲者。十人無一活。

豈徒悔封植。兼亦誤采掇。試問識藥人。始知名野葛。年深已滋蔓。刀斧不可伐。何時猛風來。爲我連根拔。有木名水榿。遠望青童童。根株非勁挺。柯葉多蒙籠。彩翠色如柏。鱗皴皮似松。爲同松柏類。得列嘉樹中。枝弱不勝雪。勢高常懼風。雪壓低還舉。風吹西覆東。柔芳甚楊柳。早落先梧桐。惟有一堪賞。中心無蠹蟲。有木名凌霄。擢秀非孤標。偶依一株樹。遂抽百尺條。託根附樹身。開花寄樹梢。自謂得其勢。無因有動搖。一旦樹摧倒。獨立暫飄飄。疾風從東起。吹折不終朝。朝爲拂雲花。暮爲委地樵。寄言立身者。勿學柔弱苗。有木名丹桂。四時香馥馥。花團夜雪明。葉翦春雲綠。風影清似水。霜枝冷如玉。獨占小山幽。不容凡鳥宿。匠人愛芳直。裁截爲厦屋。幹細力未成。用之君自速。重任雖大過。直心終不曲。縱非梁棟材。猶勝尋常木。

歎魯二首

季桓心豈忠。其富過周公。陽貨道豈正。其權執國命。由來富與權。不繫才與賢。所託得其地。雖愚亦獲安。蕪肥因糞壤。鼠穩依社壇。蟲獸尙如是。豈謂無凶緣。展禽胡爲者。直道竟三黜。顏子何如人。屢空聊過日。皆懷王佐道。不踐陪臣秩。自古無奈何。命爲時所屈。有如草木分。天各與其一。荔枝非名花。牡丹無甘實。

反鮑明遠白頭吟

炎炎者烈火。營營者小蠅。火不熱真玉。蠅不點清冰。此苟無所受。彼莫能相仍。乃知物性中。各有能不能。古稱怨報死。則人有所懲。懲淫或應可。在道未爲弘。譬如蝸鶴徒。啾啾嗥龍鵬。宜當委之去。寥廓高飛騰。豈能泥塵下。區區酬怨憎。胡爲坐自苦。吞悲仍撫膺。

青塚

上有飢鷹號。下有枯蓬走。茫茫邊雪裏。一掬沙培塿。傳是昭君墓。埋閉蛾眉久。凝脂化爲泥。鉛黛復何有。惟有陰怨氣。時生墳左右。鬱鬱如苦霧。不隨骨銷朽。婦人無他才。榮枯繫妍否。何乃明妃命。獨懸畫工手。丹青一註誤。白黑相紛糺。遂使君眼中。西施作媼母。同儕傾寵幸。異類爲配偶。禍福安可知。美顏不如醜。何言一時事。可戒千年後。特報後來姝。不須倚眉首。無辭插荆釵。嫁作貧家婦。不見青塚上。行人爲澆酒。

雜感

君子防悔尤。賢人戒行藏。嫌疑遠瓜李。言動慎毫芒。立教固如此。撫事有非常。爲君持所感。仰面問蒼蒼。犬鬻桃樹根。李樹反見傷。老龜烹不爛。延禍及枯桑。城門自焚爇。池魚罹其殃。陽貨肆兇暴。仲尼畏於匡。魯酒薄如水。邯鄲開戰場。伯禽鞭見血。過失由成王。都尉身降虜。宮刑加子長。呂安兄不道。都市殺嵇康。斯人死已久。其事甚昭彰。是非不由己。禍患安可防。使我千載後。涕泗滿衣裳。

卷三

諷諭三 凡二十首

新樂府 并序

序曰。凡九千二百五十二言。斷爲五十篇。篇無定句。句無定字。繫於意。不繫於文。首句標其目。卒章顯其志。詩三百之義也。其辭質而徑。欲見之者易諭也。其言直而切。欲聞之者深誠也。其事覈而實。使采之者

傳信也。其體順而肆。可以播於樂章歌曲也。總而言之。爲君爲臣爲民爲物爲事而作。不爲文而作也。

元和四年爲左拾遺時作

七德舞美撥亂陳王業也

法曲美列聖正華聲也

二王後明祖宗之意也

海漫漫戒求仙也

立部伎刺雅樂之替也

華原磬刺樂工非其人也

上陽白髮人愍怨曠也

胡旋女戒近習也

新豐折臂翁戒邊功也

太行路借夫婦以諷君臣之不終也

司天臺引古以儆今也

捕蝗刺長吏也

昆明春水滿思王澤之廣被也

城鹽州美聖謨而誚邊將也

道州民美臣遇明主也

馴犀感爲政之難終也

五絃彈惡鄭之奪雅也

蠻子朝刺將驕而相備位也

驃國樂欲王化之先邇後遠也

縛戎人達窮民之情也

驪宮高美天子重惜人之財力也

百鍊鏡辨皇王鑑也

青石激忠烈也

兩朱閣刺佛寺濶多也

西涼伎刺封疆之臣也

八駿圖戒奇物懲佚遊也

澗底松念寒雋也

牡丹芳美天子憂農也

紅線毯憂蠶桑之費也

杜陵叟傷農夫之困也

繡綾念女工之勞也

賣炭翁苦官市也

母別子刺新間舊也

陰山道疾貪虜也

時世耕警戒也

李夫人鑑嬖惑也

陵園妾憐幽閉也

鹽商婦惡幸人也

杏爲梁刺居處奢也

井底引銀瓶止淫奔也

官牛諷執政也

紫毫筆譏失職也

隋堤柳憫亡國也

草茫茫懲厚葬也

古塚狐戒豔色也

黑潭龍疾貪吏也

天可度惡詐人也
秦吉了哀冤民也

鴉九劍思決壅也

探詩官鑑前王亂亡之由也

七德舞

七德舞。七德歌。傳自武德至元和。元和小臣白居易。觀舞聽歌知樂意。樂終稽首陳其事。太宗十八舉義兵。白旄黃鉞定兩京。擒充戮竇四海清。二十有四功業成。二十有九卽帝位。三十有五致太平。功成理定何神速。速在推心置人腹。亡卒遺骸散帛收。飢人賣子分金贖。魏徵夢見天子泣。張謹哀聞辰日哭。怨女三千放出宮。死囚四百來歸獄。翦鬚燒藥賜功臣。李勣嗚咽思殺身。含血吮瘡撫戰士。思摩奮呼乞効死。則知不獨善戰善乘時。以心感人人心歸。今來一百九十年。天下至今歌舞之。歌七德舞。七德聖人有作垂無極。豈徒耀神武。豈徒誇聖文。太宗意在陳王業。王業艱難示子孫。

法曲歌

法曲法曲歌大定。積德重熙有餘慶。永徽之人舞而詠。法曲法曲舞霓裳。政和世理音洋洋。開元之人樂且康。法曲法曲歌堂堂。堂堂之慶垂無疆。中宗肅宗復鴻業。唐祚中興萬萬葉。法曲法曲合夷歌。夷聲邪亂華聲和。以亂干和天寶末。明年胡塵犯宮闕。乃知法曲本華風。苟能審音與政通。一從胡曲相參錯。不辨興衰與哀樂。願求牙曠正華音。不令夷夏相交侵。

二王後

二王後。彼何人。介公鄴公爲國賓。周武隋文之子孫。古人有言天下者。非是一人之天下。周亡天下傳於隋。隋人失之唐得之。唐興十葉歲二百。介公鄴公世爲客。明堂大廟朝享時。引居賓位備威儀。備威儀助郊祭。高祖太宗之遺制。不獨興滅國。不獨繼絕世。欲令嗣位守文君。亡國子孫取爲戒。

海漫漫

海漫漫。直下無底旁無邊。雲濤煙浪最深處。人傳中有三神山。山上多生不死藥。服之羽化爲天仙。秦皇漢武信此語。方士年年采藥去。蓬萊今古但聞名。烟水茫茫無覓處。海漫漫。風浩浩。眼穿不見蓬萊島。不見蓬萊不敢歸。童男艸女舟中老。徐福文成多誑誕。上元太一虛祈禱。君看驪山頂上茂陵頭。畢竟悲風吹蔓草。何況玄元聖祖五千言。不言藥。不言仙。不言白日昇青天。

立部伎

立部伎。鼓笛誼。舞雙劍。跳七丸。嫺巨索。掉長竿。太常部伎有等級。堂上者坐堂下立。堂上坐部笙歌清。堂下立部鼓笛鳴。笙歌一聲衆側耳。鼓笛萬曲無人聽。立部賤。坐部貴。坐部退爲立部伎。擊鼓吹笙和雜戲。立部又退何所任。始就樂懸操雅音。雅音替壞一至此。長令爾輩調宮徵。圓丘后土郊祀時。言將此樂感神祇。欲望鳳來百獸舞。何異北轅將適楚。工師愚賤安足云。太常三卿爾何人。

華原磬

華原磬。華原磬。古人不聽今人聽。泗濱石。泗濱石。今人不擊古人擊。今人古人何不同。用之捨之由樂工。

樂工雖在耳如壁。不分清濁卽爲雙。梨園弟子調律呂。知有新聲不知古。古稱浮馨出泗濱。立辯致死聲感人。宮懸一聽華原石。君心遂忘封疆臣。果然胡寇從燕起。武臣少肯封疆死。始知樂與時政通。豈聽鏗鏘而已矣。磬裏入海去不歸。長安市人爲樂師。華原磬與泗濱石。清濁兩聲誰得知。

上陽白髮人

上陽人。紅顏暗。老白髮。新綠衣。監使守宮門。一閉上陽多少春。玄宗末歲初選入。入時十六今六十。同時采擇百餘人。零落年深殘此身。憶昔吞悲別親族。扶入車中不教哭。皆云入內便承恩。臉似芙蓉胸似玉。未容君王得見面。已被楊妃遙側目。妬令潛配上陽宮。一生遂向空房宿。秋夜長。夜長無寐天不明。耿耿殘燈背壁影。蕭蕭暗雨打窗聲。春日遲。日遲獨坐天難暮。宮闈百轉愁厭聞。梁燕雙栖老休妬。鸞歸鵲去長悄然。春往秋來不記年。唯向深宮望明月。東西四五百迴圓。今日宮中年最老。大家遙賜尙書號。小頭鞋履窄衣裳。青黛點眉眉細長。外人不見見應笑。天寶末年時世粧。上陽人。苦最多。少亦苦。老亦苦。少苦老苦兩如何。君不見。昔時呂向美人賦。又不見。今日上陽白髮歌。

胡旋女 天寶末康居國獻之

胡旋女。胡旋女。心應絃。手應鼓。絃鼓一聲雙袖舉。迴雪飄颻轉蓬舞。左旋右轉不知疲。千匝萬周無已時。人間物類無可比。奔車輪緩旋風遲。曲終再拜謝天子。天子爲之微啓齒。胡旋女。出康居。徒勞東來萬里餘。中原自有胡旋者。鬪妙爭能爾不如。天寶季年時欲變。臣妾人人學圓轉。中有太真外祿山。二人最道能胡旋。梨花園中冊作妃。金雞障下養爲兒。祿山胡旋迷君眼。兵過黃河疑未反。貴妃胡旋惑君心。死棄

馬嵬念更深。從茲地軸天維轉。五十年來制不禁。胡旋女。莫空舞。數唱此歌悟明主。

新豐折臂翁

新豐老翁八十八。頭鬢眉鬚皆似雪。玄孫扶向店前行。左臂憑肩右臂折。問翁臂折來幾年。兼問致折何因緣。翁云貫屬新豐縣。生逢聖代無征戰。慣聽梨園歌管聲。不識旗槍與弓箭。無何天寶大徵兵。戶有三丁點一丁。點得驅將何處去。五月萬里雲南行。聞道雲南有瀘水。椒花落時瘴烟起。大軍徒涉水如湯。未過十人二三死。村南村北哭聲哀。兒別爺孃夫別妻。皆云前後征蠻者。千萬人行無一迴。是時翁年二十四。兵部牒中有名字。夜深不敢使人知。偷將大石鎚折臂。張弓簸旗俱不堪。從茲始免征雲南。骨碎筋傷非不苦。且圖揀退歸鄉土。此臂折來六十年。一肢雖廢一身全。至今風雨陰寒夜。直到天明痛不眠。痛不眠。終不悔。且喜老身今獨在。不然當時瀘水頭。身死魂飛骨不收。應作雲南望鄉鬼。萬人塚上哭啣啣。老人言。君聽取。君不聞開元宰相宋開府。不賞邊功防黷武。又不聞天寶宰相楊國忠。欲求恩幸立邊功。邊功未立生人怨。請問新豐折臂翁。

太行路

太行之路能摧車。若比人心是坦途。巫峽之水能覆舟。若比人心是安流。人心好惡苦不常。好生毛羽惡生瘡。與君結髮未五載。忽從牛女爲參商。古稱色衰相棄背。當時美人猶怨悔。何況如今鸞鏡中。妾顏未改君心改。爲君薰衣裳。君聞蘭麝不馨香。爲君盛容飾。君看金翠無顏色。行路難。難重陳。人生莫作婦人身。百年苦樂由他人。行路難。難於山。險於水。不獨人間夫與妻。近代君臣亦如此。君不見左納言。右納史。

朝承恩。暮賜死。行路難。不在水。不在山。只在人情反覆間。

司天臺

司天臺。仰觀俯察天人際。義和死來職事廢。官不求賢空取藝。昔聞西漢元成間。上凌下替謫見天。北辰微暗少光色。四星煌煌如火赤。耀芒動角射三台。上台半滅中台坼。是時非無太史官。眼見心知不敢言。明朝趨入明光殿。唯奏慶雲壽星見。天文時變兩如斯。九重天子不得知。不得知。安用臺高百尺爲。

捕蝗

捕蝗捕蝗誰家子。天熱日長飢欲死。興兀兵久傷陰陽。和氣盡蠱化爲蝗。始自兩河及三輔。荐食如蠶飛似雨。雨飛蠶食千里間。不見青苗空赤土。河南長吏言憂農。課人晝夜捕蝗蟲。是時粟斗錢三百。蝗蟲之價與粟同。捕蝗捕蝗竟何利。徒使飢人重勞費。一蟲雖死百蟲來。豈將人力競天災。我聞古之良吏有善政。以政驅蝗蝗出境。又聞貞觀之初道欲昌。文皇仰天吞一蝗。一人有慶兆民賴。是歲雖蝗不爲害。

昆明春水滿 貞元中始漲之

昆明春。昆明春。春池岸古春流新。影浸南山青澗漾。波沉西日紅淵淪。往年因旱靈池竭。龜尾曳塗魚噉沫。詔開八水注恩波。千介萬鱗同日活。今來淨淥水照天。游魚鱗鱗蓮田田。洲香杜若抽心短。沙暖鴛鴦鋪翅眠。動植飛沈皆遂性。皇澤如春無不被。漁者仍豐網罟資。貧人又獲菰蒲利。詔以昆明近帝城。官家不得收其征。菰蒲無租魚無稅。近水之人感君惠。感君惠。獨何人。吾聞率土皆王民。遠民何疏近何親。願推此惠及天下。無遠無近同欣欣。吳興山中罷權茗。鄱陽坑裏休封銀。天涯地角無禁利。熙熙同似昆明

春。

城鹽州 貞元壬申歲得詔城之

城鹽州。城鹽州。城在五原原上頭。蕃東節度鉢闌布。忽見新城當要路。金鳥飛傳贊普聞。建牙傳箭集羣臣。君臣赭面有憂色。皆言勿謂唐無人。自築鹽州十餘載。左衽氍毹不犯塞。晝牧牛羊夜捉生。長去新城百里外。諸邊急警勞戍人。唯此一道無煙塵。盧夏潛安誰復辨。秦原暗通何處見。鄜州驛路好馬來。長安藥肆黃耆賤。城鹽州。鹽州未城天子憂。德宗按圖自定計。非關將略與廟謀。吾聞高宗中宗世。北虜猖狂最難制。韓公創築受降城。三城鼎峙屯漢兵。東西巨絕數千里。耳冷不聞胡馬聲。如今邊將非無策。心笑韓公築城壁。相看養寇爲身謀。各握強兵固恩澤。願分今日邊將恩。褒贈韓公封子孫。誰能將此鹽州曲。翻作歌詞聞至尊。

道州民

道州民。多侏儒。長者不過三尺餘。市作矮奴年進送。號爲道州任土貢。任土貢。寧若斯。不聞使人生別離。老翁哭孫母哭兒。一自陽城來守郡。不進矮奴頻詔問。城云臣按六典書。任土貢有不貢無。道州水土所生者。只有矮民無矮奴。吾君感悟蠶書下。歲貢矮奴宜悉罷。道州民。老者幼者何欣欣。父兄子弟始相保。從此得作良人身。道州民。民到于今受其賜。欲說使君先下淚。仍恐兒孫忘使君。生男多以陽爲字。

馴犀

馴犀。馴犀通天犀。軀貌駭人角駭雞。海蠻聞有明天子。驅犀乘傳來萬里。一朝得謁大明宮。歡呼拜舞自

論功五年馴養始堪獻。六譯語言方得通。上嘉人獸俱來遠。蠻館四方犀入苑。銖以瑤葛鎖以金。故鄉迢遞君門深。海鳥不知鍾鼓樂。池魚空結江湖心。馴犀生處南方熱。秋無白露冬無雪。一入上林三四年。又逢今歲苦寒月。飲冰臥霰苦蹉跎。角骨凍傷鱗甲縮。馴犀死。蠻兒啼。向闕再拜顏色低。奏乞生歸本國去。恐身凍死似馴犀。君不見建中初。馴象生還放林邑。君不見貞元末。馴犀凍死蠻兒泣。所嗟建中異貞元。象生犀死何足言。

五絃彈

五絃彈。五絃彈。聽者傾耳心寥寥。趙璧知君入骨愛。五絃一一爲君調。第一第二絃索索。秋風拂松疏韻落。第三第四絃泠泠。夜鶴憶子籠中鳴。第五絃聲最掩抑。隴水凍咽流不得。五絃並奏君試聽。淒淒切切復錚錚。鐵擊珊瑚一兩曲。冰寫玉盤千萬聲。殺聲入耳膚血寒。慘氣中人肌骨酸。曲終聲盡欲半日。四座相對愁無言。座中有一遠方士。唧唧咨咨聲不已。自歎今朝初得聞。始知孤負平生耳。唯憂趙璧白髮生。老死人間無此聲。遠方士。爾聽五絃信爲美。吾聞正始之音不如是。正始之音其若何。朱絃疏越清廟歌。一彈一唱再三歎。曲淡節稀聲不多。融融曳曳召元氣。聽之不覺心平和。人情重今多賤古。古琴有絃人不撫。更從趙璧藝成來。二十五絃不如五。

蠻子朝

蠻子朝。汎皮船兮渡繩橋。來自鄴州道路遙。入界先經蜀川過。蜀將收功先表賀。臣聞雲南六詔蠻。東連牂牁西連蕃。六詔星居初瑣碎。合爲一詔漸強大。開元皇帝雖聖神。唯蠻倔強不來賓。鮮于仲通六萬卒。

征蠻一陣全軍沒。至今西洱河岸邊。箭孔刀痕滿枯骨。誰知今日慕華風。不勞一人蠻自通。誠由陛下休明德。亦賴微臣誘諭功。德宗省表知如此。笑令中使迎蠻子。蠻子導從者誰何。摩挲俗羽雙隈伽。清平官持赤藤杖。大將軍繫金吐嗟。異牟尋男尋閣勸。特勅召對延英殿。上心貴在懷遠蠻。引臨玉座近天顏。冕旒不垂親勞徠。賜衣賜食移時對。移時對不可得。大臣相看有羨色。可憐宰相拖紫佩金章。朝日唯聞對一刻。

驃國樂 貞元十七年來獻之

驃國樂。驃國樂。出自大海西南角。雍羌之子舒難陀。來獻南音奉正朔。德宗立仗御紫庭。黠纘不寒爲爾聽。玉螺一吹推髻聳。銅鼓一擊文身踊。珠纓炫轉星宿搖。花鬘斗葢龍蛇動。曲終王子啓聖人。臣父願爲唐外臣。左右歡呼何翕習。至尊德廣之所及。須臾百辟詣閣門。俯伏拜表賀至尊。伏見驃人獻新樂。請書國史傳子孫。時有擊壤老農父。暗測君心閒獨語。聞君政化甚聖明。欲感人心致太平。感人在近不在遠。太平由實非由聲。觀身理國國可濟。君如心兮民如體。體生疾苦心慚悽。民得和平君愷悌。貞元之民若未安。驃樂雖聞君不歡。貞元之民苟無病。驃樂不來君亦聖。驃樂驃樂徒喧喧。不如聞此芻蕘言。

縛戎人

縛戎人。縛戎人。耳穿面破驅入秦。天子矜憐不忍殺。詔徙東南吳與越。黃衣小使錄姓名。領出長安乘遞行。身被金瘡面多瘡。扶病徒行日一驛。朝煊飢渴費盃盤。夜臥腥臊汚床席。忽逢江水憶交河。垂手齊聲嗚咽歌。其中一虜語諸虜。爾苦非多我苦多。同伴行人因惜問。欲說喉中氣憤憤。自云鄉管本涼原。大曆

年中沒落蕃。一落蕃中四十載。遺著皮裘繫毛帶。唯許正朝服漢儀。斂衣整巾潛淚垂。誓心密定歸鄉計。不使蕃中妻子知。暗思幸有殘筋力。更恐年衰歸不得。蕃候嚴兵鳥不飛。脫身留死奔逃歸。晝伏宵行經大漠。雲陰月黑風沙惡。驚藏青塚寒草疏。偷渡黃河夜冰薄。忽聞漢軍擊鼓聲。路傍走出再拜迎。游騎不聽能漢語。將軍遂縛作蕃生。配向江南卑溼地。略無存卹空防備。念此吞聲仰訴天。若爲辛苦度殘年。涼原鄉井不得見。胡地妻兒虛棄捐。沒蕃被囚思漢土。歸漢被劫爲蕃虜。早知如此悔歸來。兩地寧如一處苦。縛戎人。戎人之中我苦辛。自古此冤應未有。漢心漢語吐蕃身。

卷四

諷諭四 新樂府 三十首

驪宮高

高高驪山上有宮。朱樓紫殿三四重。遲遲兮春日。玉甃暖兮溫泉溢。嫋嫋兮秋風。山蟬鳴兮宮樹紅。翠華不來歲月久。牆有衣兮瓦有松。吾君在位已五載。何不一幸乎其中。西去都門幾多地。吾君不遊有深意。一人出兮不容易。六宮從兮百司備。八十一車千萬騎。朝有宴飫暮有賜。中人之產數百家。未足充君一日費。吾君修己人不知。不自逸兮不自嬉。吾君愛人人不識。不傷財兮不傷力。驪宮高兮高入雲。君之來兮爲一身。君之不來兮爲萬人。

百鍊鏡

百鍊鏡。鎔範非常規。日辰處所靈且奇。江心波上舟中鑄。五月五日日午時。瓊粉金膏磨瑩已。化爲一片秋潭水。鏡成將獻蓬萊宮。楊州長史手自封。人間臣妾不合照。背有九五飛天龍。人人呼爲天子鏡。我有一言聞太宗。太宗常以人爲鏡。鑑古鑑今不鑑容。四海安危居掌內。百王治亂懸心中。乃知天子別有鏡。不是楊州百鍊銅。

青石

青石出自藍田山。兼車運載來長安。工人磨琢欲何用。石不能言我代言。不願作人家墓前神道碣。墳土未乾名已滅。不願作官家道傍德政碑。不鐫實錄鐫虛辭。願爲顏氏段氏碑。雕鏤太尉與太師。刻此兩片堅貞質。狀彼二人忠烈姿。義心若石屹不轉。死節名流確不移。如觀奮擊朱泚日。似見叱呵希烈時。各於其上題名諡。一置高山一沈水。陵谷雖遷碑獨存。骨化爲塵名不死。長使不忠不烈臣。觀碑改節慕爲人。慕爲人。勸事君。

兩朱閣

兩朱閣。南北相對起。借問何人家。貞元雙帝子。帝子吹簫雙得仙。五雲飄颻飛上天。第宅亭臺不將去。化爲佛寺在人間。粧閣妓樓何寂靜。柳似舞腰池似鏡。花落黃昏悄悄時。不聞歌吹聞鍾磬。寺門勅榜金字書。尼院佛庭寬有餘。青苔明月多閒地。比屋疲人無處居。憶昨平陽宅初置。吞併平人幾家地。仙去雙雙作梵宮。漸恐人間盡爲寺。

西涼伎

西涼伎。假面胡人假師子。刻木爲頭絲作尾。金鏡眼睛銀帖齒。奮迅毛衣擺雙耳。如從流沙來萬里。紫髯深目兩胡兒。鼓舞跳梁前致辭。應似涼州未陷日。安西都護進來時。須臾云得新消息。安西路絕歸不得。泣向師子涕雙垂。涼州陷沒知不知。師子迴頭向西望。哀吼一聲觀者悲。貞元邊將愛此曲。醉坐笑看看不足。享賓輜士宴三軍。師子胡兒長在目。有一征夫年七十。見弄涼州低面泣。泣罷斂手白將軍。主憂臣辱昔所聞。自從天寶兵戈起。犬戎日夜吞西鄙。涼州陷來四十年。河隴侵將七千里。平時安西萬里疆。今日邊防在鳳翔。緣邊空屯十萬卒。飽食溫衣閒過日。遺民腸斷在涼州。將卒相看無意收。天子每思常痛惜。將軍欲說合慚羞。奈何仍看西涼伎。取笑資歡無所愧。縱無智力未能收。忍取西涼弄爲戲。

八駿圖

穆王八駿天馬駒。後人愛之寫物圖。背如龍兮頸如象。骨竦筋高脂肉壯。日行萬里速如飛。穆王獨乘何所之。四荒八極踏欲遍。三十二蹄無歇時。屬車軸折趁不及。黃屋草生棄若遺。瑤池西赴王母宴。七廟經年不親薦。璧臺南與盛姬遊。明堂不復朝諸侯。白雲黃竹歌聲動。一人荒樂萬人愁。周從后稷至文武。積德累功世勤苦。豈知纔及四代孫。心輕王業如灰土。由來尤物不在大。能蕩君心則爲害。文帝却之不肯乘。千里馬去漢道興。穆王得之不爲戒。八駿駒來周室壤。至今此物世稱珍。不知房星之精下爲怪。八駿圖君莫愛。

澗底松

有松百尺大十圍。生在澗底寒日卑。澗深山險人路絕。老死不逢工度之。天子明堂欠梁木。此求彼有兩

不知誰諭蒼蒼造物意。但與之材不與地。金張世祿原憲貧。牛衣寒賤貂蟬貴。牛衣與貂蟬。高下雖有殊。高者未必賢。下者未必愚。君不見沈沈海底生珊瑚。歷歷天上種白榆。

牡丹芳

牡丹芳。牡丹芳。黃金蕊綻紅玉房。千片赤英霞爛爛。百枝絳豔燈煌煌。照地初開錦繡段。當風不結蘭麝囊。仙人琪樹白無色。王母桃花小不香。宿露輕盈汎紫豔。朝陽照耀生紅光。紅紫二色間深淺。向背萬態隨低昂。映葉多情隱羞面。臥叢無力含醉粧。低嬌笑容疑掩口。凝思怨人如斷腸。穠姿貴彩信奇絕。雜卉亂花無比方。石竹金錢何細碎。芙蓉芍藥苦尋常。遂使王公與卿士。遊花冠蓋日相望。庫車軟輿貴公主。香衫細馬豪家郎。衛公宅靜閉東院。西明寺深開北廊。戲蝶雙舞看人久。殘鶯一聲春日長。共愁日照芳難住。仍張帷幕垂陰涼。花開花落二十日。一城之人皆若狂。三代已還文勝質。人心重華不重實。重華直至牡丹芳。其來有漸非今日。元和天子憂農桑。卹下動天天降祥。去歲嘉禾生九穗。田中寂寞無人至。今年瑞麥分兩歧。君心獨喜無人知。無人知。可歎息。我願暫求造化力。滅却牡丹妖豔色。少迴卿士愛花心。同似吾君憂稼穡。

紅線毯

紅線毯。擇蠶繅絲清水煮。揀絲練線紅藍染。染爲紅線紅於花。織作披香殿上毯。披香殿廣十丈餘。紅線織成可殿鋪。綵絲茸茸香拂拂。線軟花虛不勝物。美人踏上歌舞來。羅襪繡鞋隨步沒。大原毯澀毳縷硬。蜀都褥薄錦花冷。不如此毯溫且柔。年年十月來宣州。宣城太守加樣織。自謂爲臣能竭力。百夫同擔進

宮中線厚絲多卷不得。宣城大守知不知。一丈毯。千兩絲。地不知寒人要暖。少奪人衣作地衣。

杜陵叟

杜陵叟。杜陵居。歲種薄田一頃餘。三月無雨旱風起。麥苗不秀多黃死。九月降霜秋早寒。禾穗未熟皆青乾。長吏明知不申破。急斂暴徵求考課。典桑賣地納官租。明年衣食將何如。剝我身上帛。奪我口中粟。虐人害物即豺狼。何必鉤爪鋸牙食人肉。不知何人奏皇帝。帝心惻隱知人弊。白麻紙上書德音。京畿盡放今年稅。昨日里胥方到門。手持勅牒榜鄉村。十家租稅八九畢。虛受吾君蠲免恩。

繅綾

繅綾繅綾何所似。不似羅綃與紈綺。應似天台山上月。明前四十五尺瀑布泉。中有文章又奇絕。地鋪白煙花。寒雪織者何人衣者誰。越溪寒女漢宮姬。去年中使宣口勅。天上取樣人間織。織爲雲外秋鴈行。染作江南春草色。廣裁衫袖長製裙。金斗熨波刀。剪紋異綵奇文相隱映。轉側看花花不定。昭陽舞人恩正深。春衣一對直千金。汗沾粉污不再着。曳土踏泥無惜心。繅綾織成費功績。莫比尋常繒與帛。絲細縲多女手疼。扎扎千聲不盈尺。昭陽殿裏歌舞人。若見織時應也惜。

賣炭翁

賣炭翁。伐薪燒炭南山中。滿面塵灰煙火色。兩鬢蒼蒼十指黑。賣炭得錢何所營。身上衣裳口中食。可憐身上衣正單。心憂炭賤願天寒。夜來城外一尺雪。曉駕炭車輾冰轍。牛困人飢日已高。市南門外泥中歇。翩翩兩騎來是誰。黃衣使者白衫兒。手把文書口稱勅。迴車叱牛牽向北。一車炭。千餘斤。宮使驅將惜不

得半正紅紉一丈綾。繫向牛頭充炭直。

母別子

母別子。子別母。白日無光哭聲苦。關西驍騎大將軍。去年破虜新策勳。勅賜金錢二百萬。洛陽迎得如花人。新人迎來舊人棄。掌上蓮花眼中刺。迎新棄舊未足悲。悲在君家留兩兒。一始扶行一初坐。坐啼行哭牽人衣。以汝夫婦新嬌婉。使我母子生別離。不如林中烏與鵲。母不失雛雄伴雌。又似園中桃李樹。花落隨風子在枝。新人新人聽我語。洛陽無限紅樓女。但願將軍重立功。更有新人勝於汝。

陰山道

陰山道。陰山道。紇邏敦肥水泉好。每至戍人送馬時。道傍千里無纖草。草盡泉枯馬病羸。飛龍但印骨與皮。五十疋縑易一疋。縑去馬來無了日。養無所用土非宜。每歲死傷十六七。縑絲不足女工苦。疎織短截充匹數。藕絲蛛網三丈餘。河鵲訴稱無用處。咸安公主號可敦。遠爲可汗頻奏論。元和二年下新勅。內出金帛酬馬直。仍詔江淮馬價縑。從此不令疎短織。合羅將軍呼萬歲。捧授金銀與縑綵。誰知黠虜啓貪心。明年馬多來一倍。縑漸好。馬漸多。陰山虜。奈爾何。

時世粧

時世粧。時世粧。出自城中傳四方。時世流行無遠近。頭不施朱面無粉。烏膏注脣唇似泥。雙眉畫作八字低。妍蚩黑白失本態。粧成盡似含悲啼。圓鬢無髮堆髻樣。斜紅不暈赭面狀。昔聞被髮伊川中。辛有見之。知有戎。元和粧梳君記取。髻堆面赭非華風。

李夫人

漢武帝初哭李夫人。夫人病時不肯別。死後留得生前恩。君恩不盡念未已。甘泉殿裏令寫真。丹青畫出竟何益。不言不笑愁殺人。又令方士合靈藥。玉釜煎鍊金爐焚。九華帳中夜悄悄。反魂香降夫人魂。夫人之魂在何許。香烟引到焚香處。既來何苦不須臾。縹渺悠揚還滅去。去何速兮來何遲。是耶非耶兩不知。翠蛾髣髴平生貌。不似昭陽寢疾時。魂之不來君心苦。魂之來兮君亦悲。背燈隔帳不得語。安用暫來還見遠。傷心不獨漢武帝。自古及今皆若斯。君不見穆王三日哭。重璧臺前傷盛姬。又不見秦陵一掬淚。馬嵬路上念楊妃。縱令妍姿豔質化爲土。此恨長在無銷期。生亦惑。死亦惑。尤物惑人忘不得。人非木石皆有情。不如不遇傾城色。

陵園妾

陵園妾。顏色如花命如葉。命如葉薄將奈何。一奉寢宮年月多。年月多。春秋思知何限。青絲髮落叢鬢疎。紅玉膚銷繫裙縵。憶昔宮中被妬猜。因讒得罪配陵來。老母啼呼趁車別。中宮監送鎖門迴。山宮一閉無開日。未死此身不令出。松門到曉月徘徊。柏城盡日風蕭瑟。松門柏城幽閉深。聞蟬聽燕感光陰。眠看菊蕊重陽淚。手把梨花寒食心。把花掩淚無人見。綠蕪牆遠青苔院。四季徒支粧粉錢。三朝不識君王面。遙想六宮奉至尊。宜徵雪夜浴堂春。雨露之恩不及者。猶聞不啻三千人。三千人。我爾君恩何厚薄。願令輪轉直陵園。三歲一來均苦樂。

鹽商婦

鹽商婦多金帛。不事田農與蠶績。南北東西不失家。風水爲鄉船作宅。本是揚州小家女。嫁得西江大商客。綠鬢富去金釵多。皓腕肥來銀釧窄。前呼蒼頭後叱婢。問爾因何得如此。墉作鹽商十五年。不屬州縣屬天子。每年鹽利入官時。少入官家多入私。官家利薄私家厚。鹽鐵尙書遠不知。何況江頭魚米賤。紅餽黃糧香稻飯。飽食濃粧倚棹樓。兩朵紅顛花欲綻。鹽商婦有幸。嫁鹽商。終朝美飯食。終歲好衣裳。好衣美食有來處。亦須慚愧桑弘羊。桑弘羊死已久。不獨漢時今亦有。

杏爲梁

杏爲梁。桂爲柱。何人堂室李開府。碧砌紅軒色未乾。去年身故今移主。高其牆。大其門。誰家第宅盧將軍。素泥朱板光未滅。今歲官收別賜人。開府之堂將軍宅。造未成時頭已白。逆旅重居逆旅中。心是主人身是客。更有愚夫念身後。心雖甚長計非久。窮奢極麗越規模。付子傳孫令保守。莫教門外過客聞。撫掌迴頭笑殺君。君不見馬家宅。尙猶存。宅門題作奉誠園。君不見魏家宅。屬他人。詔贖賜還五代孫。儉存奢失。今在目。安用高牆圍大屋。

井底引銀瓶

井底引銀瓶。銀瓶欲上絲繩絕。石上磨玉簪。玉簪欲成中央折。瓶沈簪折知奈何。似妾今朝與君別。憶昔在家爲女時。人言舉動有殊姿。嬋娟兩鬢秋蟬翼。宛轉雙娥遠山色。笑隨戲伴後園中。此時與君未相識。妾弄青梅憑短牆。君騎白馬傍垂楊。牆頭馬上遙相顧。一見知君卽斷腸。知君斷腸共君語。君指南山松柏樹。感君松柏化爲心。暗合雙鬢逐君去。到君家舍五六年。君家大人頻有言。聘則爲妻奔是妾。不堪主

祀奉蘋蘩終知君家不可住。其奈出門無去處。豈無父母在高堂。亦有情親滿故鄉。潛來更不通消息。今日悲羞歸不得。爲君一日恩。誤妾百年身。寄言癡小人家女。慎勿將身輕許人。

官牛

官牛官牛駕官車。澆水岸邊驅載沙。一石沙。幾斤重。朝載暮載將何用。載向五門官道西。綠槐陰下鋪沙堤。昨來新拜右丞相。恐怕泥塗污馬蹄。右丞相。馬蹄踏沙雖淨潔。牛領牽車欲流血。右丞相。但能濟人治國調陰陽。官牛領穿亦無妨。

紫毫筆

紫毫筆。尖如錐。兮利如刀。江南石上有老兔。喫竹飲泉生紫毫。宣城之人采爲筆。千萬毛中揀一毫。毫雖輕。功甚重。管勒工名充歲貢。君兮臣兮勿輕用。將何如。願賜東西府御史。願頒左右臺起居。搦管趨入黃金闕。抽毫立在白玉除。臣有奸邪正衙奏。君有動言直筆書。起居郎。侍御史。爾知紫毫不易致。每歲宣城進筆時。紫毫之價如金貴。慎勿空將彈失儀。慎勿空將錄制詞。

隋堤柳

隋堤柳。歲久年深盡衰朽。風飄飄兮雨蕭蕭。三株兩株汴河口。老枝病葉愁殺人。曾經大業年中春。大業年中煬天子。種柳成行夾流水。西自黃河東至淮。綠影一千三百里。大業末年春暮月。柳色如烟絮如雪。南幸江都恣佚遊。應將此柳繫龍舟。紫髯郎將護錦纜。青娥御史直迷樓。海內財力此時竭。舟中歌笑何日休。上荒下困勢不久。宗社之危如綴旒。煬天子。自言福祿長無窮。豈知皇子封鄴公。龍舟未過彭城閣。

義旗已入長安宮。蕭牆禍生人事變。晏駕不得歸秦中。土墳數尺何處葬。吳公臺下多悲風。二百年來汴河路。沙草和煙朝復暮。後王何以鑒前王。請看隋堤亡國樹。

草茫茫

草茫茫。土蒼蒼。蒼茫茫在何處。驪山脚下秦皇墓。墓中下涸二重泉。當時自以爲深固。下流水銀象江海。上綴珠光作鳥兔。別爲天地於其間。擬將富貴隨身去。一朝盜掘墳陵破。龍樽神堂三月火。可憐寶玉歸人間。暫借泉中買身禍。奢者狼藉儉者安。一凶一吉在眼前。憑君迴首向南望。漢文葬在灞陵原。

古塚狐

古塚狐。妖且老。化爲婦人顏色好。頭變雲鬢面變粧。大尾曳作長紅裳。徐徐行傍荒村路。日欲暮時人靜處。或歌或舞或悲啼。翠眉不舉花顏低。忽然一笑千萬態。見者十人八九迷。假色迷人猶如是。真色迷人應過此。彼真此假俱迷人。人心惡假貴重真。狐假女妖害猶淺。一朝一夕迷人眼。女爲狐媚害卽深。日長月長溺人心。何況褒姒之色善蠱惑。能喪人家覆人國。君看爲害淺深間。豈將假色同真色。

黑潭龍

黑潭水深色如墨。傳有神龍人不識。潭上架屋官立祠。龍不能神人神之。豐凶水旱與疾疫。鄉里皆言龍所爲。家家養豚漉清酒。朝祈暮賽依巫口。神之來兮風飄飄。紙錢動兮錦傘搖。神之去兮風亦靜。香火滅兮杯盤冷。肉堆潭岸石。酒潑廟前草。不知龍神饜幾多。林鼠山狐長醉飽。狐何幸。豚何辜。年年殺豚將餒狐。狐假龍神食豚盡。九重泉底龍知無。

天可度

天可度。地可量。唯有人心不可防。但見丹誠赤如血。誰知僞言巧似簧。勸君掩鼻君莫掩。使君夫婦爲參商。勸君掇蜂君莫掇。使君父子爲豺狼。海底魚兮天上鳥。高可射兮深可釣。唯有人心相對時。咫尺之間不能料。君不見李義府之輩。笑欣欣。笑中有刀潛殺人。陰陽神變皆可測。不測人間笑是瞋。

秦吉了

秦吉了。出南中。彩毛青黑花頸紅。耳聰心慧舌端巧。鳥語人言無不通。昨日長爪鷲。今日大鸞鳥。鷲抱乳燕一窠覆。鳥啄母雞雙眼枯。雞號墮地燕驚去。然後拾卵攫其雛。豈無鷗與鶻。噉中食飽不肯搏。亦有鸞鶴羣。閒立颺高如不聞。秦吉了。人云爾是能言鳥。豈不見雞燕之冤苦。吾聞鳳凰百鳥主。爾竟不爲鳳凰之前致一言。安用噪噪閒言語。

鴉九劍

歐冶子死千年後。精靈闢授張鴉九。鴉九鑄劍吳山中。天與日時神借功。金鐵騰精火翻焰。踊躍求爲鑄。鑄劍劍成未試十餘年。有客持金買一觀。誰知閉匣長思用。三尺青蛇不肯蟠。客有心。劍無口。容代劍言告鴉九。君勿矜我玉可切。君勿誇我鍾可刺。不如持我決浮雲。無令漫漫蔽白日。爲君使無私之光及萬物。蟄蟲昭蘇萌草出。

采詩官

采詩官。采詩聽歌導人言。言者無罪聞者誠。下流上通上下泰。周滅秦興至隋氏。十代采詩官不置。郊廟

登歌讚君美。樂府豔詞悅君意。若求輿論規刺言。萬句千章無一字。不是章句無規刺。漸及朝廷絕諷議。諍臣杜口爲冗員。諫鼓高懸作虛器。一人負屨常端默。百辟入門兩自媚。夕郎所賀皆德音。春官每奏唯祥瑞。君之堂兮千里遠。君之門兮九重闕。君耳唯聞堂上言。君眼不見門前事。貪吏害民無所忌。奸臣蔽君無所畏。君不見厲王胡亥之末年。羣臣有利君無利。君兮君兮願聽此。欲開壅蔽達人情。先向歌詩求諷刺。

卷五

閑適一 古調詩 凡五十三首

常樂里閑居偶題十六韻兼寄劉十五公輿王十一起呂二炁呂四穎崔玄亮十八元九積劉三十三敦質張十五仲元時爲校書郎

帝都名利場。雞鳴無安居。獨有懶慢者。日高頭未梳。工拙性不同。進退亦遂殊。幸逢太平代。天子好文儒。小才難大用。典校在祕書。三旬兩入省。因得養頑疏。茅屋四五間。一馬二僕夫。俸錢萬六千。月給亦有餘。旣無衣食牽。亦少人事拘。遂使少年心。日日常晏如。勿言無已知。躁靜各有徒。蘭臺七八人。出處與之俱。旬時阻談笑。旦夕望軒車。誰能讎校間。解帶臥吾廬。窗前有竹甃。門外有酒沽。何以待君子。數竿對一壺。

答元八宗簡同遊曲江後明日見贈

長安千萬人。出門各有營。惟我與夫子。信馬悠悠行。行到曲江頭。反照草樹明。南山好顏色。病客有心情。

水禽翻白羽。風荷嫋翠莖。何必滄浪去。卽此可濯纓。時景不重來。賞心難再并。坐愁紅塵裏。夕鼓瑟瑟聲。歸來經一宿。世慮稍復生。賴聞瑤華唱。再得塵襟清。

感時

朝見日上天。暮見日入地。不覺明鏡中。忽年三十四。勿言身未老。冉冉行將至。白髮雖未生。朱顏已先悴。人生詎幾何。在世猶如寄。雖有七十期。十人無一二。今我猶未悟。往往不適意。胡爲方寸間。不貯浩然氣。貧賤非不惡。道在何足避。富貴非不愛。時來當自致。所以達人心。外物不能累。唯當飲美酒。終日陶陶醉。斯言勝金玉。佩服無失墜。

首夏同諸校正遊開元觀因宿翫月

我與二三子。策名在京師。官小無職事。閑於爲客時。沉沉道觀中。心賞期在茲。到門車馬迴。入院巾杖隨。清和四月初。樹木正華滋。風清新葉影。鳥戀殘花枝。向夕天又晴。東南餘霞披。置酒西廊下。待月盃行遲。須臾金魄生。若與吾徒期。光華一照耀。樓殿相參差。終夜清景前。笑歌不知疲。長安名利地。此興幾人知。

永崇里觀居

季夏中氣候。煩暑自此收。蕭颯風雨天。蟬聲暮嘒嘒。永崇里巷靜。華陽觀院幽。軒車不到處。滿地槐花秋。年光忽冉冉。世事本悠悠。何必待衰老。然後悟浮休。眞隱豈長遠。至道在冥搜。身雖世界住。心與虛無遊。朝飢有蔬食。夜寒有布裘。幸免凍與餒。此外復何求。寡欲雖少病。藥天心不憂。何以明吾志。周易在床頭。

早送舉人入試

夙駕送舉人。東方猶未明。自謂出太早。已有車馬行。騎火高低影。街鼓參差聲。可憐早朝者。相看意氣生。日出塵埃飛。羣動互營營。營營各何求。無非利與名。而我常晏起。虛住長安城。春深官又滿。日有歸山情。

招王質夫 自此後詩爲藍屋尉時作

濯足雲水客。折腰簪笏身。誼閑迹相背。十里別經旬。忽因乘逸興。莫惜訪羈塵。窗前故栽竹。與君爲主人。

祇役略口因與王質夫同遊秋山偶題三韻

石擁百泉合。雲破千峯開。平生烟霞侶。此地重徘徊。今日勤王意。一半爲山來。

見蕭侍御憶舊山草堂詩因以繼和

琢玉以爲架。綴珠以爲籠。玉架絆野鶴。珠籠鎖冥鴻。鴻思雲外天。鶴憶松上風。珠玉信爲美。鳥不戀其中。臺中蕭侍御。心與鴻鶴同。晚起慵冠豸。閑行厭避驄。昨見憶山詩。詩思浩無窮。歸夢杳何處。舊居洛水東。秋閑杉桂林。春老芝朮叢。自云別山後。離抱常忡忡。衣繡非不榮。持憲非不雄。所樂不在此。悵望草堂空。

病假中南亭閑望

欬枕不視事。兩日門掩關。始知吏役身。不病不得閑。閑意不在遠。小亭方丈間。西簷竹梢上。坐見太白山。遙愧峯上雲。對此塵中顏。

仙遊寺獨宿

沙鶴上階立。潭月當戶開。此中留我宿。兩夜不能迴。幸與靜境遇。喜無歸侶催。從今獨遊後。不擬共人來。

前庭涼夜

露簾色似玉。風幌影如波。坐愁樹葉落。中庭明月多。

官舍小亭閒望

風竹散清韻。煙槐凝綠姿。日高人吏去。閒坐在茅茨。葛衣禦時暑。蔬飯療朝飢。持此聊自足。心力少營爲。亭上獨吟罷。眼前無事時。數峯太白雪。一卷陶潛詩。人心各自是。我是良在茲。迴謝爭名客。甘從君所嗤。

早秋獨夜

井桐涼葉動。鄰杵秋聲發。獨向簷下眠。覺來半床月。

聽彈古淥水

聞君古淥水。使我心和平。欲識慢流意。爲聽疎汎聲。西窗竹陰下。竟日有餘清。

松齋自題 時爲翰林學士

非老亦非少年。過三紀餘。非賤亦非貴。朝登一命初。才小分易足。心寬體長舒。充腸皆美食。容膝卽安居。况此松齋下。一琴數帙書。書不求甚解。琴聊以自娛。夜直入君門。晚歸臥吾廬。形骸委順動。方寸付空虛。持此將過日。自然多晏如。昏昏復默默。非智亦非愚。

冬夜與錢員外同直禁中

夜深草詔罷。霜月淒凜凜。欲臥煖殘盃。燈前相對飲。連鋪青縑被。對置通中枕。髣髴百餘宵。與君同此寢。

和錢員外禁中夙興見示

窗白星漢曙。窗暖燈火餘。坐卷朱裏幕。看封紫泥書。宵宵鍾漏盡。瞳瞳霞景初。樓臺紅照曜。松竹青扶疏。

君愛此時好。迴頭時謂余。不知上清界。曉景復何如。

夏日獨直寄蕭侍御

憲臺文法地。翰林清切司。鷹猜課野鶴。驥德責山麋。課責雖不同。同歸非所宜。是以方寸內。忽忽暗相思。夏日獨上直。日長何所爲。澹然無他念。虛靜是吾師。形委有事牽。心與無事期。中臆一以曠。外累都若遺。地貴身不覺。意閑境來隨。但對松與竹。如在山中時。情性聊自適。吟詠偶成詩。此意非夫子。餘人多不知。

松聲

片好好獨坐。雙松在前軒。西南微風來。潛入枝葉間。蕭寥發爲聲。半夜明月前。寒山颯颯雨。秋琴泠泠絃。一聞滌炎暑。再聽破昏煩。竟夕遂不寐。心體俱脩然。南陌車馬動。西鄰歌吹繁。誰知茲簷下。滿耳不爲喧。

禁中

門嚴九重靜。窗幽一室閑。好是修心處。何必在深山。

贈吳丹

巧者力苦勞。智者心苦憂。愛君無巧智。終歲閑悠悠。嘗登御史府。亦佐東諸侯。手操糺謬簡。心運決勝籌。官途似風水。君心如虛舟。况然而不有。進退得自由。今來脫豸冠。時往侍龍樓。官曹稱心靜。居處隨迹幽。冬負南榮日。支體甚溫柔。夏臥北窗風。枕席如涼秋。南山入舍下。酒甕在床頭。人間有閑地。何必隱林丘。顧我愚且昧。勞生殊未休。一入金門直。星霜三四周。主恩信難報。近地徒久留。終當乞閑官。退與夫子遊。

初除戶曹喜而言志

詔授戶曹掾。捧認感君恩。感恩非爲己。祿養及吾親。弟兄俱簪笏。新婦儼衣巾。羅列高堂下。拜慶正紛紛。俸錢四五萬。月可奉晨昏。廩祿二百石。歲可益倉囤。喧喧車馬來。賀客滿我門。不以我爲貪。知我家內貧。置酒延賀客。客容亦歡欣。笑云今日後。不復憂空罇。答云如君言。願君小逡巡。我有平生志。醉後爲君陳。人生百歲期。七十有幾人。浮榮及虛位。皆是身之賓。惟有衣與食。此事粗關身。苟免飢寒外。餘物盡浮雲。

秋居書懷

門前少賓客。階下多松竹。秋景下西牆。涼風入東屋。有琴慵不弄。有書閑不讀。盡日方寸中。澹然無所欲。何須廣居處。不用多積蓄。丈室可寄身。斗儲可充腹。况無治道術。坐受官家祿。不種一株桑。不鋤一壠穀。終朝飽飯食。卒歲豐衣食。持此知愧心。自然易爲足。

禁中曉臥因懷王起居

遲遲禁漏盡。悄悄暝鴉喧。夜雨槐花落。微涼臥北軒。曙燈殘未滅。風簾閑自翻。每一得靜境。思與故人言。

養拙

鐵柔不爲劍。木曲不爲轅。今我亦如此。愚蒙不及門。甘心謝名利。滅跡歸丘園。坐臥茅茨中。但對琴與樽。身去羶鎖累。耳辭朝市諠。迢遙無所爲。時窺五千言。無憂樂性場。寡欲清心源。始知不才者。可以深道根。

寄李十一建

外事牽我形。外物誘我情。李君別來久。褊悷從中生。憶昨訪君時。立馬扣柴荆。有時君未起。稚子喜先迎。連步笑出門。衣翻冠或傾。掃階苔文綠。拂榻藤陰清。家醞及春熟。園葵乘露烹。看山東亭坐。待月南原行。

門靜唯鳥語。坊遠少鼓聲。相對盡日言。不及利與名。分手來幾時。明月三四盈。別時殘花落。及此新蟬鳴。芳歲忽已晚。離抱恨未平。豈不思命駕。吏職坐相縈。前時君有期。訪我來山城。心賞久云阻。言約無自輕。相去幸非遠。走馬一日程。

旅次華州贈袁右丞

渭水綠溶溶。華山青崇崇。山水一何麗。君子在其中。才與世會合。物隨誠感通。德星降人福。時雨助歲功。化行人無訟。囹圄千日空。政順氣亦和。黍稷三年豐。客自帝城來。驅馬出關東。愛此一郡人。如見太古風。方今天子心。憂人正忡忡。安得天下守。盡得如袁公。

酬楊九弘貞長安病中見寄

伏枕君寂寂。折腰我營營。所嗟經時別。相去一宿程。攜手昨何時。昆明春水平。離郡來幾日。太白夏雲生。之子未得意。貧病客帝城。貧堅志士節。病長高人情。隱几自恬淡。閉門無送迎。龍臥心有待。鶴瘦貌彌清。清機發爲文。投我如振瓊。何以慰飢渴。捧之吟一聲。

禁中寓直夢遊仙遊寺

西軒草詔暇。松竹深寂寂。月出清風來。忽似山中夕。因成西南夢。夢作遊仙客。覺聞宮漏聲。猶謂山泉滴。

贈王山人

聞君減寢食。日聽神仙說。暗待非常人。潛求長生訣。言長本對短。未離生死轍。假使得長生。才能勝夭折。松樹千年朽。槿花一日歇。畢竟共虛空。何須誇歲月。彭生徒自異。生死終無別。不如學無生。無生卽無滅。

秋山

久病曠心賞。今朝一登山。山秋雲物冷。稱我清羸顏。白石臥可枕。青蘿行可攀。意中如有得。盡日不欲還。人生無幾何。如寄天地間。心有千載憂。身無一日閑。何時解塵網。此地來掩關。

贈能七倫

澗松高百尋。四時寒森森。臨風有清韻。向日無曲陰。如何時俗人。但賞桃李林。豈不知堅貞。芳馨誘其心。能生學爲文。氣高功亦深。手中一百篇。句句披沙金。苦節二十年。無人振陸沉。今我尙貧賤。徒爲爾知音。

題揚穎士西亭

靜得亭上境。遠諧塵外蹤。憑軒東望好。鳥滅山重重。竹露冷煩襟。杉風清病容。曠然冥真趣。道與心相逢。卽此可遺世。何必蓬壺峯。

題贈鄭祕書徵君石溝溪隱居

鄭君得自然。虛白生心胸。吸彼沆瀣精。凝爲冰雪容。大君貞元初。求賢致時邕。蒲輪入翠微。迎下天台峯。赤城別松喬。黃閣交夔龍。俛仰受三命。從容辭九重。出籠鶴翩翩。歸林鳳嚙嚙。在火辨良玉。經霜識貞松。新居寄楚山。山碧溪溶溶。丹竈燒煙煴。黃精花丰茸。蕙帳夜瑟淡。桂樽春酒濃。時人不到處。苔石無塵蹤。我今何爲者。趨世身龍鍾。不向林壑訪。無由朝市逢。終當解纓網。卜策來相從。

及第後歸覲留別諸同年

十年常苦學。一上謬成名。擢第未爲貴。賀親方始榮。時輩六七八。送我出帝城。軒車動行色。絲管舉離聲。

得意減別恨。半酣輕遠程。翩翩馬蹄疾。春日歸鄉情。

清夜琴興

月出烏栖盡。寂然坐空林。是時心境閑。可以彈素琴。清冷由本性。恬淡隨人心。心積和平氣。本應正始音。響餘羣動息。曲罷秋夜深。正聲感元化。天地清沈沈。

效陶潛體詩十六首 并序

余退居渭上。杜門不出。時屬多雨。無以自娛。會家醞新熟。雨中獨飲。往往酣醉。終日不醒。懶放之心。彌覺自得。故得於此。而有以忘於彼者。因詠陶淵明詩。適與意會。遂傲其體。成十六篇。醉中狂言。醒輒自哂。然知我者亦無隱焉。

不動者厚地。不息者高天。無窮者日月。長在者山川。松柏與龜鶴。其壽皆千年。嗟嗟羣物中。而人獨不然。早出向朝市。暮已歸下泉。形質及壽命。危脆若浮煙。堯舜與周公。古來稱聖賢。借問今何在。一去亦不還。我無不死藥。萬萬隨化遷。所未定知者。修短遲速間。幸及身健日。當歌一罇前。何必待人勸。念此自爲歡。翳翳踰月陰。沈沈連日雨。開簾望天色。黃雲暗如土。行潦毀我墻。疾風壞我宇。蓬莠生庭院。泥塗失場圃。村深絕賓客。窗晦無僑侶。盡日不下床。跳蛙時入戶。出門無所往。入室還獨處。不以酒自娛。塊然與誰語。朝飲一盃酒。冥心合元化。兀然無所思。日高尙閑臥。暮讀一卷書。會意如嘉話。欣然有所遇。夜深猶獨坐。又得琴上趣。按絃有餘暇。復多詩中狂。下筆不能罷。惟茲三四事。持用度晝夜。所以陰雨中。經旬不出舍。始悟獨住人心安時亦過。

東家采桑婦。雨來苦愁悲。蒨葢北堂前。雨冷不成絲。西家荷鋤叟。雨來亦怨咨。種豆南山下。雨多落爲箕。而我獨何幸。醞酒本無期。及此多雨日。正遇新熟時。開瓶瀉樽中。玉液黃金卮。持觥已可悅。歡嘗有餘滋。一酌發好容。再酌開愁眉。連延四五酌。酣暢入四肢。忽然遺物我。誰復分是非。是時連夕雨。酩酊所無知。人心苦顛倒。反爲憂者嗤。

朝亦獨醉歌。暮亦獨醉睡。未盡一壺酒。已成三獨醉。勿嫌飲太少。且喜歡易致。一盃復兩盃。多不過三四。便得心中適。盡忘身外事。更復強一盃。陶然遺萬累。一飲一石者。徒以多爲貴。及其酩酊時。與我亦無異。笑謝多飲者。酒錢徒自費。

天秋無片雲。地靜無纖塵。團團新晴月。林外生白輪。憶昨陰霖天。連連三四旬。賴逢家醞熟。不覺過朝昏。私言雨霽後。可以罷餘樽。及對新月色。不醉亦愁人。床頭殘酒榼。欲盡味彌淳。攜置南簷下。舉酌自殷勤。清光入盃杓。白露生衣巾。乃知陰與晴。安可無此君。我有樂府詩。成來人未聞。今宵醉有興。狂詠驚四鄰。獨賞猶復爾。何況有交親。

中秋三五夜。明月在前軒。臨觴忽不飲。憶我平生歡。我有同心人。邈邈崔與錢。我有忘形友。迢迢李與元。或飛青雲上。或落江湖間。與我不相見。於今四五年。我無縮地術。君非馭風仙。安得明月下。四人來晤言。良夜信難得。佳期杳無緣。明月又不駐。漸下西南天。豈無他時會。惜此清景前。

家醞飲已盡。村中無酒賒。坐愁今夜醒。其奈秋懷何。有客忽叩門。言語一何佳。云是南村叟。挈榼來相過。且喜樽不燥。安問少與多。重陽雖已過。籬菊有殘花。歡來苦晝短。不覺夕陽斜。老人勿遽起。且待新月華。

客去有餘趣。竟夕獨酣歌。

願生衣百結。顏子食一簞。歎然樂其志。有以忘飢寒。今我何人哉。德不及先賢。衣食幸相屬。胡爲不自安。况茲清渭曲。居處安且閑。榆柳百餘樹。茅茨十數間。寒負簷下日。熱濯澗底泉。日出猶未起。日入已復眠。西風滿村巷。清涼八月天。但有雞犬聲。不聞車馬喧。時傾一罇酒。坐望東南山。稚姪初學步。牽衣戲我前。卽此自可樂。庶幾顏與原。

湛湛罇中酒。有功不自伐。不伐人不知。我今代其說。良將臨大敵。前驅千萬卒。一罇投河飲。赴死心如一。壯士磨匕首。勇憤氣咆嘯。一酣忘報讎。四體如無骨。東海殺孝婦。天旱踰年月。一酌酬其魂。通霄雨不歇。咸陽秦獄氣。冤痛結爲物。千歲不肯散。一沃亦銷失。况茲兒女恨。及彼幽憂疾。快飲無不消。如霜得春力。方知麴蘖靈。萬物無與正。

煙雲隔玄甫。風波限瀛洲。我豈不欲往。大海路阻修。神仙但聞說。靈藥不可求。長生無得者。舉世如蜉蝣。逝者不重迴。存者難久留。脚蹶未死間。何苦懷百憂。念此忽內熱。生看成白頭。舉盃還獨飲。顧影自獻酬。心與口相約。未醉勿言休。今朝不盡醉。知有明朝不。不見郭門外。纍纍墳與丘。月明愁殺人。黃蒿風颭颭。死者若有知。悔不乘燭遊。

吾聞潯陽郡。昔有陶徵君。愛酒不愛名。憂醒不憂貧。嘗爲彭澤令。在官纔八旬。愀然忽不樂。挂印着公門。口吟歸去來。頭戴漉酒巾。人吏留不得。直入故山雲。歸來五柳下。還以酒養真。人間榮與利。擺落如泥塵。先生去已久。紙墨有遺文。篇篇勸我飲。此外無所云。我從老大來。竊慕其爲人。其他不可及。且微醉昏昏。

楚王疑忠臣。江南放屈平。晉朝輕高士。林下棄劉伶。一人常獨醉。一人常獨醒。醒者多苦志。醉者多歡情。歡情信獨善。苦志竟何成。兀傲壘間臥。憔悴澤畔行。彼憂而此樂。道理甚分明。願君且飲酒。勿思身後名。有一燕趙士。言貌甚奇瓌。日日酒家去。脫衣典數盃。問君何落拓。云僕生草萊。地寒命且薄。徒抱王佐才。豈無濟時榮。君門乏良媒。三獻寢不報。遲遲空手迴。亦有同門生。先升青雲梯。貴賤交道絕。朱門叩不開。及歸種禾黍。三歲早爲災。入山燒黃白。一旦化爲灰。蹉跎五十餘。生死苦不諧。處處去不得。却歸酒中來。南巷有貴人。高蓋駟馬車。我門何所苦。四十垂白鬚。答云君不知。位重多憂虞。北里有寒士。甕牖繩爲樞。出扶桑藜杖。入臥蝸牛廬。散賤無憂患。心安體亦舒。東鄰有富翁。藏貨徧五都。東京收粟帛。西市鬻金珠。朝營暮計算。晝夜不安居。西舍有貧者。正婦配正夫。布裙行賃舂。短褐坐傭書。以此求口食。一飽欣有餘。貴賤與貧富。高下雖有殊。憂樂與利害。彼此不相踰。是以達人觀。萬化同一途。但未知生死。勝負兩何如。遲疑未知間。且以酒爲娛。

濟水澄而潔。河水渾而黃。交流列四瀆。清濁不相傷。太公戰牧野。伯夷餓首陽。同時號賢聖。進退不相妨。謂天不愛民。胡爲生稻梁。謂天果愛民。胡爲生豺狼。謂神福善人。孔聖竟栖遑。謂神禍淫人。暴秦終霸王。顏回與黃憲。何辜早夭亡。螻蛇與鳩鳥。何得壽延長。物理不可測。神道亦難量。舉頭仰問天。天色但蒼蒼。唯當多種黍。日醉手中觴。

卷六

閑適二 古調詩 五言 自兩韻至一百三十韻 凡四十八首

自題寫真 時爲翰林學士

我貌不自識。李放寫我真。靜觀神與骨。合是山中人。蒲柳質易朽。麋鹿心難馴。何事赤墀上。五年爲侍臣。况多剛狷性。難與世同塵。不惟非貴相。但恐生禍因。宜當早罷去。收取雲泉身。

遣懷 自此後詩在渭村作

寓心身體中。寓性方寸內。此身是外物。何足苦憂愛。况有假飾者。華簪及高蓋。此又疎於身。復在外物外。操之多惴慄。失之又悲悔。乃知名與器。得喪俱爲害。頽然環堵客。蘿蕙爲巾帶。自得此道來。身窮心甚泰。

渭上偶釣

渭水如鏡色。中有鯉與魴。偶持一竿竹。懸釣至其傍。微風吹釣絲。嫋嫋十尺長。誰知對魚坐。心在無何鄉。昔有白頭人。亦釣此渭陽。釣人不釣魚。七十得文王。况我垂釣意。人魚又兼亡。無機兩不得。但弄秋水光。興盡釣亦罷。歸來飲我觴。

隱几

身適忘四支。心適忘是非。既適又忘適。不知吾是誰。百體如槁木。兀然無所知。方寸如死灰。寂然無所思。今日復明日。身心忽兩遺。行年三十九。歲暮日斜時。四十心不動。吾今其庶幾。

春眠

新浴支體暢。獨寢神魄安。况因夜深坐。遂成日高眠。春被薄亦暖。朝窗深更閑。却忘人間事。似得枕上仙。

至適無夢想。大和難名言。全勝彭澤醉。欲敵曹溪禪。何物呼我覺。伯勞聲闕闕。起來妻子笑。生計春茫然。
閑居

空腹一盞粥。飢食有餘味。南簷半床日。暖臥因成睡。絺袍擁兩膝。竹几支雙臂。從旦直至昏。身心一無事。心足卽爲富。身閑乃當貴。富貴在此中。何必居高位。君看裴相國。金紫光照地。心苦頭盡白。幾年四十四。乃知高蓋車。乘者多憂畏。

夏日

東窗晚無熱。北戶涼有風。盡日坐復臥。不離一室中。中心本無繫。亦與出門同。

適意二首

十年爲旅客。常有飢寒愁。三年作諫官。復多尺素羞。有酒不暇飲。有山不得遊。豈無平生志。拘牽不自由。一朝歸渭上。泛如不繫舟。置心世事外。無喜亦無憂。終日一蔬食。終年一布裘。寒來彌懶放。數日一梳頭。朝睡足始起。夜釣醉卽休。人心不過適。適外復何求。

早歲從旅遊。頗諳時俗意。中年忝班列。備見朝廷事。作客誠已難。爲臣尤不易。况予方且介。舉動多件累。直道速我尤。詭遇非吾志。胸中十年內。消盡浩然氣。自從返田畝。頓覺無憂愧。蟠木用難施。浮雲心易遂。悠悠身與世。從此兩相棄。

首夏病間

我生來幾時。萬有四千日。自省於其間。非憂卽有疾。老去慮漸息。年來病初愈。忽喜身與心。泰然兩無苦。

况茲孟夏月。清和好時節。微風吹袂衣。不寒復不熱。移榻樹陰下。竟日何所爲。或飲一甌茗。或吟兩句詩。內無憂患迫。外無職役羈。此日不自適。何時是適時。

晚春沽酒

百花落如雪。兩鬢垂作絲。春去有來日。我老無少時。人生待富貴。爲樂常苦遲。不如貧賤日。隨分開愁眉。賣我所乘馬。典我舊朝衣。盡將沽酒飲。酩酊步行歸。名姓日隱晦。形骸日變衰。醉臥黃公肆。人知我是誰。

蘭若寓居

名宦老慵求。退身安草野。家園病懶歸。寄居在蘭若。薜衣換簪組。藜杖代車馬。行止輒自由。甚覺身蕭灑。晨遊南塢上。夜息東菴下。人間千萬事。無有關心者。

麴生訪宿

西齋寂已暮。叩門聲摘摘。知是君宿來。自拂塵埃席。村家何所有。茶果迎來客。貧靜似僧居。竹林依四壁。廚燈斜影出。簷雨餘聲滴。不是愛閑人。肯來同此夕。

聞庾七左降因詠所懷

我病臥涓北。君老謫巴東。相悲一長歎。薄命與君同。既歎還自哂。哂歎兩未終。後心諒前意。所見何迷蒙。人生大塊間。如鴻毛在風。或飄青雲上。或落泥塗中。袞服相天下。儻來非我通。布衣委草莽。偶去非吾窮。外物不可必。中懷須自空。無令怏怏氣。留滯在心胸。

答卜者

病眼昏似夜。衰鬢颯如秋。除却須衣食。平生百事休。知君善易者。問我決疑不。不卜非他故。人間無所求。

歸田三首

人生何所欲。所欲唯兩端。中人愛富貴。高士慕神仙。神仙須有籍。富貴亦在天。莫戀長安道。莫尋方丈山。西京塵浩浩。東海浪漫漫。金門不可入。琪樹何由攀。不如歸山下。如法種春田。

種田計已決。決意復何如。賣馬買犢使。徒步歸田廬。迎春治耒耜。候雨闢菑畬。策杖田頭立。躬親課僕夫。吾聞老農言。爲稼慎在初。所施不鹵莽。其報必有餘。上求奉王稅。下望備家儲。安得放慵墮。拱手而曳裾。學農未爲鄙。親友勿笑余。更待明年後。自擬執犂鋤。

三十爲近臣。腰間鳴珮玉。四十爲野夫。田中學鋤穀。何言十年內。變化如此速。此理固是常。窮通相倚伏。爲魚有深水。爲鳥有高木。何必守一方。窘然自牽束。化吾足爲馬。吾因以行陸。化吾手爲彈。吾因以求肉。形骸爲異物。委順心猶足。幸得且歸農。安知不爲福。况吾行欲老。警若風前燭。孰能俄頃間。將心繫榮辱。

秋遊原上

七月行已半。早涼天氣清。清晨起巾櫛。徐步出柴荆。露杖筇竹冷。風襟越蕙輕。閑攜弟姪輩。同上秋原行。新棗未全赤。晚瓜有餘馨。依依田家叟。設此相逢迎。自我到此村。往來白髮生。村中相識久。老幼皆有情。留連向暮歸。樹樹風蟬聲。是時新雨足。禾黍夾道青。見此令人飽。何必待西成。

九日登西原宴望

病愛枕席涼。日高眠未輟。弟兄呼我起。今日重陽節。起登西原望。懷抱同一豁。移座就菊叢。銜酒前羅列。

雖無絲與管。歌笑隨情發。白日未及傾。顏酡耳已熱。酒酣四向望。六合何空闊。天地自久長。斯人幾時活。請看原下村。村人死不歇。一村四十家。哭葬無虛月。指此各相勉。良辰且歡悅。

寄同病者

三十生二毛。早衰爲沈疴。四十官七品。拙宦非由他。年顏日枯槁。時命日蹉跎。豈獨我如此。聖賢無奈何。週觀親舊中。舉目尤可嗟。或有終老者。沉賤如泥沙。或有始壯者。飄忽如風花。窮餓與天促。不如我者多。以此反自慰。常得心平和。寄言同病者。迴歎且爲歌。

遊藍田山下居

脫置腰下組。擺落心中塵。行歌望山去。意似歸鄉人。朝蹋玉峯下。暮尋藍水濱。擬求幽僻地。安置疎慵身。本性便山寺。應須旁悟真。

村雪夜坐

南窗背燈坐。風霰暗紛紛。寂寞深村夜。殘雁雪中聞。

東園翫菊

少年昨已去。芳歲今又闌。如何寂寞意。復此荒涼園。園中獨立久。日淡風露寒。秋蔬盡蕪沒。好樹亦凋殘。唯有數叢菊。新開籬落間。攜觴聊就酌。爲爾一留連。憶我少小日。易爲興所牽。見酒無時節。未飲已欣然。近從年長來。漸覺取樂難。常恐更衰老。強飲亦無歡。願謂爾菊花。後時何獨鮮。誠知不爲我。借爾暫開顏。

觀稼

世役不我牽。身心常自若。晚出看田畝。閑行旁村落。蠶蠶繞場稼。嘖嘖羣飛雀。年豐豈獨人。禽鳥聲亦樂。田翁逢我喜。默起具樽杓。斂手笑相延。社酒有殘酌。愧茲勤日敬。藜杖爲淹泊。言動任天真。未覺農人惡。停杯問生事。夫種妻兒穫。筋力苦疲勞。衣食長單薄。自慚祿仕者。曾不營農作。飽食無所勞。何殊衛人鶴。

聞哭者

昨日南鄰哭。哭聲一何苦。云是妻哭夫。夫年二十五。今朝北里哭。哭聲又何切。云是母哭兒。兒年十七八。四鄰尙如此。天下多夭折。乃知浮世人。少得垂白髮。余今過四十。念彼聊自悅。從此明鏡中。不嫌頭似雪。

新構亭臺示諸弟姪

平臺高數尺。臺上結茅茨。東西疏二牖。南北開兩扉。蘆簾前後卷。竹簾當中施。清冷白石枕。疎涼黃葛衣。開衿向風坐。夏日如秋時。嘯傲頗有趣。窺臨不知疲。東窗對華山。三峯碧參差。南簷當渭水。臥見雲帆飛。仰摘枝上果。俯折畦中葵。足以充飢渴。何必慕甘肥。况有好藝從。旦夕相追隨。

自吟拙什因有所懷

懶病每多暇。暇來何所爲。未能拋筆硯。時作一篇詩。詩成淡無味。多被衆人嗤。上怪落聲韻。下嫌拙言詞。時時自吟詠。吟罷有所思。蘇州及彭澤。與我不同時。此外復誰愛。唯有元微之。趁向江陵府。三年作判司。相去二千里。詩成遠不知。

東陵秋意寄元八

寥落野陂畔。獨行思有餘。秋荷病葉上。白露大如珠。忽憶同賞地。曲江東北隅。秋池少遊客。唯我與君俱。

啼蛩隱紅蓼。瘦馬蹠青蕪。當時與今日。俱是暮秋初。節物苦相似。時景亦無餘。唯有人分散。經年不得書。

閑居

深閉竹間扉。靜掃松下地。獨嘯晚風前。何人知此意。看山盡日坐。枕帙移時睡。誰能從我遊。使君心無事。

詠拙

所稟有巧拙。不可改者性。所賦有厚薄。不可移者命。我性拙且慙。我命薄且屯。問我何以知。所知良有因。亦曾舉兩足。學人踏紅塵。從茲知性拙。不解轉如輪。亦曾奮六翮。高飛到青雲。從茲知命薄。摧落不遽巡。慕貴而厭賤。樂富而惡貧。同出天地間。我豈異於人。性命苟如此。反則成苦辛。以此自安分。雖窮每欣欣。蒼茅爲我廬。編蓬爲我門。縫布作袍被。種穀充盤飧。靜讀古人書。閑釣清渭濱。優哉復遊哉。聊以終吾身。

詠慵

有官慵不選。有田慵不農。屋穿慵不葺。衣裂慵不縫。有酒慵不酌。無異樽長空。有琴慵不彈。亦與無絃同。家人告飯盡。欲炊慵不舂。親朋寄書至。欲讀慵開封。常聞嵇叔夜。一生在慵中。彈琴復鍛鐵。比我未爲慵。

冬夜

家貧親愛散。身病交遊罷。眼前無一人。獨掩村齋臥。冷落燈火暗。離披簾幕破。策策窗戶前。又聞新雪下。長年漸省睡。夜半起端坐。不學坐忘心。寂寞安可過。兀然身寄世。浩然心委化。如此來四年。一千三百夜。

村中留李三宿

平生早遊宦。不道無親故。如我與君心。相知應有數。春明門前別。金氏陂中遇。村酒兩三盃。相留寒日暮。

勿嫌村酒薄。聊酌論心素。請君少踟躕。繫馬門前樹。明年身若健。便擬江湖去。他日縱相思。知君無覓處。後會既茫茫。今宵君且住。

友人夜訪

簷間清風簾。松下明月杯。幽意正如此。况乃故人來。

遊悟真寺詩 一百三十韻

元和九年秋。八月月上弦。我遊悟真寺。寺在王順山。去山四五里。先聞水潺湲。自茲捨車馬。始涉藍溪灣。手拄青竹杖。足蹋白石灘。漸怪耳目曠。不聞人世諠。山下望山上。初疑不可攀。誰知中有路。盤折通巖巖。一息幡竿下。再休石龕邊。龕間長丈餘。門戶無扃關。俯窺不見人。石髮垂若鬢。鷲出白蝙蝠。雙飛如雪翻。迴首寺門望。青崖夾朱軒。如壁山腹開。置寺於其間。入門無平地。地窄虛空寬。房廊與臺殿。高下隨峯巒。巖嶠無撮土。樹木多瘦堅。根株抱石長。屈曲蟲蛇蟠。松桂亂無行。四時鬱芊芊。枝梢嫋清吹。韻若風中絃。日月光不透。綠陰相交延。幽鳥時一聲。聞之似寒蟬。首憩賓位亭。就坐未及安。須臾開北戶。萬里明豁然。拂簷虹霏微。遠棟雲迴旋。赤日間白雨。陰晴同一川。野綠蕪草樹。眼界吞秦原。渭水細不見。漢陵小於拳。却顧來時路。縈紆映朱欄。歷歷上山人。一一遙可觀。前對多寶塔。風鐸鳴四端。樂櫃與戶牖。恰恰金碧繁。云昔迦葉佛。此地坐涅槃。至今鐵鉢在。當底手跡穿。西開玉像殿。白佛森比肩。抖擻塵埃衣。禮拜冰雪顏。疊霜爲袈裟。貫雹爲華鬘。逼觀疑鬼功。其跡非雕鐫。次登觀音堂。未到聞梅檀。上階脫雙履。斂足升淨筵。六檀挑玉鏡。四座敷金鈿。黑夜自光明。不待燈燭燃。衆寶互低昂。碧珮珊瑚蟠。風來似天樂。相觸聲珊珊。

白珠垂露凝。赤珠滴血殷。點綴佛髻上。合爲七寶冠。雙瓶白瑤璃。色若秋水寒。隔瓶見舍利。圓轉如金丹。玉笛何代物。天人施祇園。吹如秋鶴聲。可以降靈仙。是時秋方中。三五月正圓。寶堂豁三門。金魄當其前。月與寶相射。晶光爭鮮妍。照人心骨冷。竟夕不欲眠。曉尋南塔路。亂竹低嬋娟。林幽不逢人。寒蝶飛翩翩。山果不識名。離離夾道蕃。足以療飢乏。摘嘗味甘酸。道南藍谷神。紫傘白紙錢。若歲有水旱。詔使修蘋蘩。以地清淨故。獻典無葦臚。危石疊四五。巖窺欹且剝。造物者何意。堆在巖東偏。冷滑無人迹。苔點如花牋。我來登上頭。下臨不測淵。目眩手足掉。不敢低頭看。風從石下生。薄人而上搏。衣服似羽翮。開張欲飛鶩。巖巖三面峯。峯尖刀劍攢。往往白雲過。決開露青天。西北日落時。夕暉紅團團。千里翠屏外。走下丹砂丸。東南月上時。夜氣青漫漫。百丈碧潭底。寫出黃金盤。藍水色似藍。日夜長潺潺。周迴繞山轉。下視如青環。或鋪爲慢流。或激爲奔湍。泓澄最深處。浮出蛟龍涎。側身入其中。懸磴尤險難。捫蘿踏膠木。下逐飲澗猿。雪迸起白鷺。錦跳驚紅鱸。歇定方盪漉。濯去支體煩。淺深皆洞澈。可照腦與肝。但愛清見底。欲尋不知源。東崖饒怪石。積甃蒼琅玕。溫潤發於外。其間韞瓊璠。卞和死已久。良玉多棄捐。或時洩光彩。夜與星月連。中頂最高峯。柱天青玉竿。鸚鵡上不得。豈我能攀援。上有白蓮池。素葩覆清瀾。聞名不可到。處所非人寰。又有一片石。大如方尺磚。插在半壁上。其下萬仞懸。云有過去師。坐得無生禪。號爲定心石。長老世相傳。却上謁仙祠。蔓草生縣縣。昔聞王氏子。羽化升上玄。其西曦樂臺。猶對芝朮田。時復明月夜。上聞黃鶴言。迴尋畫龍堂。二叟鬢髮班。想見聽法時。歡喜禮印壇。復歸泉窟下。化作龍蜿蜒。階前石孔在。欲雨生白烟。往有寫經僧。身靜心精專。感彼雲外鶴。羣飛千翩翩。來添硯中水。去吸巖底泉。一日三往復。時節長不憊。

經成號聖僧。弟子名揚難。誦此蓮花偈。數滿百億千。身壞口不壞。舌根如紅蓮。顏骨今不見。石函尙存焉。粉壁有吳畫。筆彩依舊鮮。素屏有楷書。墨色如新乾。靈境與異跡。周覽無不殫。一遊五晝夜。欲返仍盤桓。我本山中人。誤爲時網牽。牽率使讀書。推挽令効官。旣登文字科。又忝諫諍員。拙直不合時。無益同素餐。以此自慚惕。戚戚常寡歡。無成心力盡。未老形骸殘。今來脫簪組。始觀離憂患。及爲山水遊。彌得縱疎頑。野廣斷羈絆。行走無拘攣。池魚放入海。一往何時還。身著居士衣。手把南華篇。終來此山住。永謝區中緣。我今四十餘。從此終身閑。若以七十期。猶得三十年。

酬張十八訪宿見贈 自此後詩爲贊善大夫時所作

昔我爲近臣。君常稀到門。今我官職冷。惟君來往頻。我受狷介性。立爲頑拙身。平生雖寡合。合卽無緇磷。况君秉高義。富貴視如雲。五侯三相家。眼冷不見君。問其所與游。獨言韓舍人。其次卽及我。我愧非其倫。胡爲謬相愛。歲晚逾勤勤。落然頽簷下。一話夜達晨。床單食味薄。亦不嫌我貧。日高上馬去。相顧猶逡巡。長安久無雨。日赤風昏昏。憐君將病眠。爲我犯埃塵。遠從延康里。來訪曲江濱。所重君子道。不獨愧相親。

朝歸書寄元八

進入閣前拜。退就廊下餐。歸來昭國里。人臥馬歇鞍。却睡至日午。起坐心浩然。况當好時節。雨後清和天。柿樹綠陰合。王家庭院寬。瓶中鄠縣酒。牆上終南山。獨眠仍獨坐。開衿當風前。禪僧與詩客。次第來相看。要語連夜語。須眠終日眠。除非奉朝謁。此外無別牽。年長身且健。官貧心甚安。幸無急病痛。不至苦飢寒。自此聊以適。外緣不能干。惟應靜者信。難爲動者言。臺中元侍御。早晚作郎官。未作郎官際。無人相伴閑。

酬吳七見寄

曲江有病客。尋常多掩關。又聞馬死來。不出身更閑。聞有送書者。自起出門看。素絨暑丹字。中有瓊瑤篇。口吟耳自聽。當暑忽愴然。似漱寒玉水。如聞商風絃。首章歎時節。末句思笑言。懶慢不相訪。隔街如隔山。常聞陶潛語。心遠地自偏。君住安邑里。左右車徒喧。竹藥閉深院。琴罇開小軒。誰知市南作。轉作壺中天。君本上清人名在石堂間。不知有何過。謫作人間仙。常恐歲月滿。飄然歸紫烟。莫忘蜉蝣內。進士有同年。

昭國閑居

貧閑日高起。門巷晝寂寂。時暑放朝參。天陰少人客。槐花滿田地。僅絕人行跡。獨在一床眠。清涼風雨夕。勿嫌坊曲遠。近即多牽役。勿嫌祿俸薄。厚即多憂責。平生尚恬曠。老大宜安適。何以養吾真。官閑居處僻。

喜陳兄至

黃鳥啼欲歇。青梅結半成。坐憐春物盡。起入東園行。攜觴懶獨酌。忽聞叩門聲。閑人猶喜至。何況是陳兄。從容盡日語。稠疊長年情。勿輕一盞酒。可以話平生。

贈杓直

世路重祿位。慚慚者孔宣。人情愛年壽。天死者顏淵。二人如何人。不奈命與天。我今信多幸。撫己愧前賢。己年四十四。又爲五品官。况茲知足外。別有所安焉。早年以身代。直赴逍遙篇。近歲將心地。迴向南宗禪。外順世間法。內脫區中緣。進不厭朝市。退不戀人寰。自吾得此心。投足無不安。體非道引適。意無江湖閑。有興或飲酒。無事多掩關。寂靜夜深坐。安穩日高眠。秋不苦長夜。春不惜流年。委形老小外。忘懷生死間。

昨日共君語。與余心齊然。此道不可道。因君聊強言。

寄張十八

飢止一簞食。渴止一壺漿。出入止一馬。寢興止一牀。此外無長物。於我有若亡。胡然不知足。名利心遑遑。念茲彌懶放。積習遂爲常。經旬不出門。竟日不下堂。同病者張生。貧僻住延康。慵中每相憶。此意未能忘。迢迢青槐街。相去八九坊。秋來未相見。應有新詩章。早晚來同宿。天氣轉清涼。

題玉泉寺

漠漠玉泉色。悠悠浮雲身。閑心對定水。清淨兩無塵。手把青筇杖。頭戴白綸巾。興盡下山去。知我是誰人。朝回遊城南。

朝退馬未困。秋初日猶長。迴轡城南去。郊野正清涼。水竹夾小徑。縈迴繞川岡。仰看晚山色。俯弄秋泉光。青松繫我馬。白石爲我牀。常時簪組累。此日和身忘。且隨鷓鴣末。暮遊鳴鶴傍。機心一以盡。兩處不亂行。誰辨心與跡。非行亦非藏。

舟行

帆影日漸高。閑眠猶未起。起問鼓櫂人。已行三十里。船頭有行竈。炊稻烹紅鯉。飽食起婆娑。盪漱秋江水。平生滄浪意。一旦來遊此。何況不失家。舟中載妻子。

湓浦早冬

潯陽孟冬月。草木未全衰。祇抵長安陌。涼風八月時。日西湓水曲。獨行吟舊詩。蓼花始零落。蒲葉稍離披。

但作城中想。何異曲江池。

江州雪

新雪滿前山。初晴好天氣。日西騎馬出。忽有京都意。城柳方綴花。簷冰才結穗。須臾風日暖。處處皆飄墜。行吟賞未足。坐歎消何易。猶勝嶺南看。霧霧不到地。

卷七

閑適三 古調 五言 五十八首

題潯陽樓 自此後詩江州司馬時作

常愛陶彭澤。文思何高玄。又怪韋江州。詩情亦清閑。今朝登此樓。有以知其然。大江寒見底。匡山青倚天。深夜盪浦月。平旦鑪峯煙。清輝與靈氣。日夕供文篇。我無二人才。孰爲來其間。因高偶成句。俯仰愧江山。

訪陶公舊宅 并序

予夙慕陶淵明爲人。往歲渭川閑居。嘗有傲陶體詩十六首。今遊廬山。經柴桑。過栗里。思其人。訪其宅。不能默默。又題此詩云。

垢塵不污玉。靈鳳不啄糞。嗚呼陶靖節。生彼晉宋間。心實有所守。口終不能言。永惟孤竹子。拂衣首陽山。夷齊各一身。窮餓未爲難。先生有五男。與之同飢寒。腸中食不充。身上衣不完。連徵竟不起。斯可謂真賢。我生君之後。相去五百年。每讀五柳傳。目想心拳拳。昔常詠遺風。著爲十六篇。今來訪故宅。森若君在前。

不慕樽有酒。不慕琴無絃。慕君遺榮利。老死此丘園。柴桑古村落。栗里舊山川。不見離下菊。但餘墟中烟。子孫雖無聞。族氏猶未遷。每逢姓陶人。使我心依然。

北亭

廬宮山下州。濫浦沙邊宅。宅北倚高岡。迢迢數千尺。上有青青竹。竹間多白石。茅亭居上頭。豁達門四闕。前楹卷簾箔。北牖施床席。江風萬里來。吹我涼淅淅。日高公府歸。巾笏隨手擲。脫衣恣搔首。坐臥任所適。時傾一盃酒。曠望湖天夕。口詠獨酌謠。目送歸飛翮。漸無出塵操。未免折腰役。偶獲此閑居。謬似高人跡。

遊盪水

四月未全熱。麥涼江氣秋。湖山處處好。最愛盪水頭。盪水從東來。一派入江流。可憐似縈帶。中有隨風舟。命酒一臨汎。捨鞍揚棹謳。放迺岸傍馬。去逐波間鷗。烟浪始渺渺。風襟亦悠悠。初疑上河漢。中若尋瀛洲。汀樹綠拂地。沙草芳未休。青蘿與紫葛。枝蔓垂相樛。繫纜步平岸。迴頭望江州。城雉映水見。隱隱如蜃樓。日入意未盡。將歸復少留。到官行半歲。今日方一遊。此地來何暮。可以寫吾憂。

答故人

故人對酒歎。歎我在天涯。見我昔榮遇。念我今蹉跎。問我爲司馬。官意復如何。答云且勿歎。聽我爲君歌。我本蓬華人。鄙賤劇泥沙。讀書未百卷。信口嘲風花。自從筮仕來。六命三登科。顧慚虛劣姿。所得亦已多。散員足庇身。薄俸可資家。省分輒自愧。豈爲不遇耶。煩君對盃酒。爲我一咨嗟。

官舍內新鑿小池

簾下開小池。盈盈水方積。中底鋪白沙。四隅甃青石。勿言不深廣。但取幽人適。泛灑微雨朝。泓澄明月夕。豈無大江水。波浪連天白。未如床席前。方丈深盈尺。清淺可狎弄。昏煩聊漱滌。最愛曉暝時。一片秋天碧。

宿簡寂觀

巖白雲尙屯。林紅葉初隕。秋光引閑步。不知身遠近。夕投靈洞宿。臥覺塵機泯。名利心既忘。市朝夢亦盡。暫來尙如此。况乃終身隱。何以療夜飢。一匙雲母粉。

讀謝靈運詩

吾聞達士道。窮通順冥數。通乃朝廷來。窮則江湖去。謝公才廓落。與世不相遇。壯志鬱不用。須有所洩處。洩爲山水詩。逸韻諧奇趣。大必籠天海。細不遺草樹。豈唯翫景物。亦欲據心素。往往卽事中。未能忘興論。因知康樂作。不獨在章句。

北亭獨宿

悄悄壁下床。紗籠耿殘燭。夜半獨眠覺。疑在僧房宿。

約心

黑鬢絲雪侵。青袍塵土浣。兀兀復騰騰。江城一爲佐。朝就高齋上。薰然負暄臥。晚下小池前。澹然臨水坐。已約終身心。長如今日過。

晚望

江城寒角動。沙洲夕鳥還。獨在高亭上。西南望遠山。

早春

雪消冰又釋。景和風復暄。滿庭田地溼。薺葉生牆根。官舍情無事。日西斜掩門。不開莊老卷。欲與何人言。

春寢

何處春暄來。微和生血氣。氣薰肌骨暢。東窗一昏睡。是時正月晦。假日無公事。爛熯不能休。自午將及未。緬思少健日。甘寢常自恣。一從衰疾來。枕上無此味。

睡起晏坐

後亭晝眠足。起坐春景暮。新覺眼猶昏。無思心正住。淡寂歸一性。虛閑遺萬慮。了然此時心。無物可譬喻。本是無有鄉。亦名不用處。行禪與坐忘。同歸無異路。

詠懷

盡日松下坐。有時池畔行。行立與坐臥。中懷澹無營。不覺流年過。亦任白髮生。不爲世所薄。安得遂閑情。

春遊西林寺

下馬西林寺。愴然進輕策。朝爲公府吏。暮是靈山客。二月匡廬北。冰雪始消釋。陽叢抽茗牙。陰竇洩泉脈。熙熙風土暖。藹藹雲嵐積。散作萬壑春。凝爲一氣碧。身閑居澹泊。官散無牽迫。緬彼十八人。古今同此適。是年淮寇起。處處興兵革。智士勞思謀。戎臣苦征役。獨有不才者。山中弄泉石。

出山吟

朝詠遊仙詩。暮歌采薇曲。臥雲坐白石。山中十五宿。行隨出洞水。迴別緣巖竹。早晚重來遊。心期瑤草綠。

歲暮

已任時命去。亦從歲月除。中心一調伏。外累盡空虛。名宦意已矣。林泉計何如。擬近東林寺。溪邊結一廬。

聞早鶯

日出眠未起。屋頭聞早鶯。忽如上林曉。萬年枝上鳴。憶爲近臣時。秉筆直承明。春深視草暇。旦暮聞此聲。今聞在何處。寂寞潯陽城。鳥聲信如一。分別在人情。不作天涯意。豈殊禁中聽。

栽杉

勁葉森利劍。孤莖挺端標。纒高四五尺。勢若干青霄。移栽東甯前。愛爾寒不凋。病夫臥相對。日夕閱蕭蕭。昨爲山中樹。今爲簷下條。雖然遇賞翫。無乃近塵囂。猶勝澗谷底。埋沒隨衆樵。不見鬱鬱松。委質山上苗。

過李生

蘋小蒲葉短。南湖春水生。子近湖邊住。靜境稱高情。我爲郡司馬。散拙無所營。使君知性野。衡退任闌行。行攜小榼出。逢花輒獨傾。半酣到子舍。下馬扣柴荆。何以引我步。繞籬竹萬莖。何以醒我酒。吳音吟一聲。須臾進野飯。飯稻茹芹英。白甌青竹筯。儉潔無羶腥。欲去復徘徊。夕鴉已飛鳴。何當重遊此。待君湖水平。

詠意

常聞南華經。巧勞智憂愁。不如無能者。飽食但遨遊。平生愛慕道。今日近此流。自來潯陽郡。四序忽已周。不分物黑白。但與時沉浮。朝飧夕安寢。用是爲身謀。此外卽閑放。時尋山水幽。春遊慧遠寺。秋上庾公樓。或吟詩一章。或飲茶一甌。身心一無繫。浩浩如虛舟。富貴亦有苦。苦在心危憂。貧賤亦有樂。樂在身自由。

食筍

此州乃竹鄉。春筍滿山谷。山夫折盈抱。抱來早市鬻。物以多爲賤。雙錢易一束。置之炊飯中。與飯同時熟。紫籜圻故錦。素肌擘新玉。每日遂加飧。經時不思肉。久爲京洛客。此味常不足。且食勿踟躕。南風吹作竹。

遊石門澗

石門無舊徑。披榛訪遺跡。時逢山水秋。清輝如古昔。常聞慧遠輩。題詩此巖壁。雲覆莓苔封。蒼然無處覓。蕭疎野生竹。崩剝多年石。自從東晉後。無復人遊歷。獨有秋澗聲。潺湲空旦夕。

招東鄰

小榼二升酒。新篔六尺床。能來夜話否。池畔欲秋涼。

題元十八溪亭

怪君不喜仕。又不遊州里。今日到幽居。了然知所以。宿君石溪亭。潺湲聲滿耳。飲君螺盃酒。醉臥不能起。見君五老峯。益悔居城市。愛君三男兒。始歎身無子。余方鍾峯下。結室爲居士。山北與山東。往來從此始。

香鍾峯下新置草堂卽事詠懷題於石上

香鍾峯北面。遺愛寺西偏。白石何鑿鑿。清流亦潺潺。有松數十株。有竹千餘竿。松張翠繖蓋。竹倚青琅玕。其下無人居。惜哉多歲年。有時聚猿鳥。終日空風烟。時有沉冥子。姓白字樂天。平生無所好。見此心依然。如獲終老地。忽乎不知還。架巖結茅宇。剛整開茶園。何以洗我耳。屋頂落飛泉。何以淨我眼。砌下生白蓮。左手攜一壺。右手挈五絃。傲然意自足。箕踞於其間。興酣仰天歌。歌中聊寄言。言我本野夫。誤爲世網牽。

時來昔捧日。老去今歸山。倦鳥得茂樹。涸魚反清源。捨此欲焉往。人間多險艱。

草堂前新開一池養魚種荷日有幽趣

淙淙冰峽水。浩浩萬頃陂。未如新塘上。微風動漣漪。小萍加泛泛。初蒲正離離。紅鯉二三寸。白蓮八九枝。逸水欲成徑。護堤方插籬。已被山中客。呼作白家池。

白雲期

三十氣太壯。胸中多是非。六十身太老。四體不支持。四十至五十。正是退閑時。年長識命分。心慵少營爲。見酒興猶在。登山力未衰。吾年幸當此。且與白雲期。

登香鑪峯頂

迢迢香鑪峯。心存耳目想。終年牽物役。今日方一往。攀蘿躡危石。手足勞俯仰。同遊三四人。兩人不敢上。上到峯之頂。目眩神恍惚。高低有萬尋。闊狹無數丈。不窮視聽界。焉識宇宙廣。江水細如繩。湓城小於掌。紛吾何屑屑。未能脫塵鞅。歸去思自嗟。低頭入蟻壤。

答崔侍郎錢舍人書問因繼以詩

旦暮兩蔬食。日中一閑眠。便是了一日。如此已三年。心不擇時適。足不揀地安。窮通與遠近。一貫無兩端。常見今之人。其心或不然。在勞則念息。處靜已思喧。如是用身心。無乃自傷殘。坐輸憂惱便。况得形神全。吾有二道友。藹藹崔與錢。同飛青雲路。獨墮黃泥泉。歲暮物萬變。故情何不遷。應爲平生心。與我同一源。帝鄉遠於日。美人高在天。誰謂萬里別。常若在目前。泥泉樂者魚。雲路遊者鸞。勿言雲泥異。同在逍遙間。

因君問心地。書後偶成篇。慎勿說向人人。人多笑此言。

烹葵

昨臥不夕食。今起乃朝飢。貧廚何所有。炊稻烹秋葵。紅粒香復軟。綠英滑且肥。飢來止於飽。飽後復何思。思憶榮遇日。迫今窮退時。今亦不凍餒。昔亦無餘資。口既不減食。身又不減衣。撫心私自問。何者是榮衰。勿學常人意。其間分是非。

小池二首

晝倦前齋熱。晚愛小池清。映林餘景沒。近水微涼生。坐把蒲葵扇。閑吟三兩聲。有意不在大。湛湛方丈餘。荷側瀉清露。萍開見游魚。每一臨此坐。憶歸青溪居。

閉關

我心忘世久。世亦不我干。遂成一無事。因得常掩關。掩關來幾時。髣髴二三年。著書已盈帙。生子欲能言。始悟向身老。復悲世多艱。迴顧趨時者。役役塵壤間。歲暮竟何得。不如且安閑。

弄龜羅

有姪始六歲。字之爲阿龜。有女生三年。其名曰羅兒。一始學笑語。一能誦歌詩。朝戲抱我足。夜眠枕我衣。汝生何其晚。我年行已衰。物情少可念。人意老多愁。酒美竟須壞。月圓終有虧。亦如恩愛緣。乃是憂惱資。舉世同此累。吾安能去之。

截樹

種樹當前軒。樹高柯葉繁。惜哉遠山色。隱此蒙龍間。一朝持斧斤。手自截其端。萬葉落頭上。千峯來面前。忽似決雲霧。豁達觀青天。又如所念人。久別一款顏。始有清風至。稍見飛鳥還。開懷東南望。目遠心遼然。人各有偏好。物莫能兩全。豈不愛柔條。不如見青山。

望江樓上作

江畔百尺樓。樓前千里道。憑高望平遠。亦足舒懷抱。驛路使憧憧。關防兵草草。及茲多事日。尤覺閑人好。我年過不惑。休退誠非早。從此拂塵衣。歸山未爲老。

題座隅

手不任執爨。肩不能荷鋤。量力揆所用。曾不敵一夫。幸因筆硯功。得升仕進途。歷官凡五六。祿俸及妻奴。左右有兼僕。出入有單車。自奉雖不厚。亦不至飢飭。若有人及此。傍觀爲何如。雖賢亦爲幸。况我鄙且愚。伯夷古賢人。魯山亦其徒。時哉無奈何。俱化爲餓殍。念彼益自愧。不敢忘斯須。平生榮利心。破滅無遺餘。猶恐塵妄起。題此於座隅。

昔與微之在朝日。同蓄休退之心。迨今十年。淪落老大。追尋前約。且結後期。

往子爲御史。伊余忝拾遺。皆逢盛明代。俱登清近司。予繫玉爲佩。子曳繡爲衣。從容香烟下。同侍白玉墀。朝見寵者辱。暮見安者危。紛紛無退者。相顧令人悲。宦情君早厭。世事我深知。常於榮顯日。已約林泉期。况今各流落。身病齒髮衰。不作臥雲計。攜手欲何之。待君女嫁後。及我官滿時。稍無骨肉累。粗有漁樵資。歲晚青山路。白首期同歸。

垂釣

臨水一長嘯。忽思十年初。三登甲乙第一。入承明廬。浮生多變化。外事有盈虛。今來伴江叟。沙頭坐釣魚。

晚燕

百鳥乳雛畢。秋燕獨蹉跎。去社日已近。啣泥意如何。不悟時節晚。徒施功用多。人間事亦爾。不獨燕營窠。

贖雞

清晨臨江望。水禽正諠繁。鳧鴈與鷗鷺。游颺戲朝暾。適有鬻雞者。挈之來遠村。飛鳴彼何樂。窘束此何冤。喔喔十四鵠。罩縛同一樊。足傷金距縮。頭搶花冠翻。經宿廢飲啄。日高詣屠門。遲遲未死間。飢渴欲相吞。常慕古人道。仁信及魚豚。見茲生惻隱。贖放雙林園。開籠解索時。雞雞聽我言。購爾鏹三百。小惠何足論。莫學銜環雀。崎嶇護報恩。

秋日懷杓直

晚來天色好。獨出江邊步。憶與李舍人。曲江相近住。常云遇清景。必約同幽趣。若不訪我來。還須覓君去。開眉笑相見。把手期何處。西寺老胡僧。南園亂松樹。攜持小酒榼。吟詠新詩句。同出復同歸。從朝直至暮。風雨忽消散。江山眇迴互。潯陽與潯陽。相望空雲霧。心期自乖曠。時景還如故。今日郡齋中。秋光誰共度。

食後

食罷一覺睡。起來兩甌茶。舉頭看日影。已復西南斜。樂人惜日促。憂人厭年賒。無憂無樂者。長短任生涯。

齊物二首

青松高百丈。綠蕙低數寸。同生大塊間。長短各有分。長者不可退。短者不可進。若用此理推。窮通兩無悶。椿壽八千春。槿花不經宿。中間復何有。冉冉孤生竹。竹身三年老。竹色四時綠。雖謝椿有餘。猶勝槿不足。

山下宿

獨到山下宿。靜向月中行。何處水邊碓。夜舂雲母聲。

題舊寫真圖

我昔三十六。寫貌在丹青。我今四十六。衰頹臥江城。豈止十年老。曾與衆苦井。一照舊圖畫。無復昔儀形。形影默相顧。如弟對老兄。况使他人見。能不昧平生。羲和鞭日走。不爲我少停。形骸屬日月。老去何足驚。所恨凌烟閣。不得畫功名。

閑居

肺病不飲酒。眼昏不讀書。端然無所作。身意閑有餘。雞栖籬落晚。雪映林木疎。幽獨已云極。何必山中居。

對酒示行簡

今日一樽酒。歡暢何怡怡。此樂從中來。他人安得知。兄弟唯二人。遠別恆苦悲。今春自巴峽。萬里平安歸。復有雙幼妹。笄年未結褵。昨日嫁娶畢。良人皆可依。憂念兩消釋。如刀斷羈縻。身輕心無繫。忽欲凌空飛。人生苟有累。食肉常如飢。我心既無苦。飲水亦可肥。行簡勸爾酒。停盃聽我辭。不歎鄉國遠。不嫌官祿微。但願我與爾。終老不相離。

詠懷

冉求與顏淵。卞和與馬遷。或罹天六極。或被人刑殘。顧我僞爲幸。百骸且完全。五十不爲天。吾今欠數年。知分心自足。委順身常安。故雖窮退日。而無戚戚顏。昔有榮先生。從事於其間。今我不量力。舉心欲攀援。窮通不由己。歡戚不由天。命卽無奈何。心可使泰然。且務由己者。省躬諒非難。勿問由天者。天高難與言。

夜琴

蜀桐木性實。楚絲音韻清。調慢彈且緩。夜深十數聲。入耳淡無味。愜心潛有情。自弄還自罷。亦不要人聽。

山中獨吟

人各有一癖。我癖在章句。萬緣皆已銷。此病獨未去。每逢美景。或對好親故。高聲詠一篇。恍若與神遇。自爲江上客。半在山中住。有時新詩成。獨上東巖路。身依白石崖。手攀青桂樹。狂吟驚林壑。猿鳥皆窺覷。恐爲世所嗤。故就無人處。

達理二首

何物壯不老。何時窮不通。如彼音與律。宛轉旋爲宮。我命獨何薄。多悴而少豐。當壯已先衰。暫泰還長窮。我無奈命何。委順以待終。命無奈我何。方寸如虛空。嗚然與化俱。混然與俗同。誰能坐自若。齟齬於其中。舒姑化爲泉。牛哀病作虎。或柳生肘間。或男變爲女。鳥獸及水木。本不與民伍。胡然生變遷。不待死歸土。百骸是己物。尙不能爲主。况彼時命間。倚伏何足數。時來不可遏。命去焉能取。唯當養浩然。吾聞達人語。

湖亭晚望殘水

湖上秋沈寥。湖邊晚蕭瑟。登亭望湖水。水縮湖底出。清滯得早霜。明滅浮殘日。流注隨地勢。窪坳無定質。

泓澄白龍臥。宛轉青蛇屈。破鏡折劍頭。光芒又非一。久爲山水客。見盡幽奇物。及來湖亭望。此狀難談悉。乃知天地間。勝事殊未畢。

郭盧舟相訪

朝暖就南軒。暮寒歸後屋。晚酒一兩杯。夜棋三數局。寒灰埋暗火。曉焰凝殘燭。不嫌貧冷人。時來同一宿。

卷八

閑適四 古調詩五言 凡五十七首

長慶二年七月自中書舍人出守杭州路次藍溪作

大原一男子。自顧庸且鄙。老逢不次恩。洗拔出泥滓。既居可言地。願助朝廷理。伏闕三上章。懇愚不稱旨。聖人存大體。優貸容不死。鳳詔停舍人。魚書除刺史。寬懷齊寵辱。委順隨行止。我自得此心。于茲十年矣。餘杭乃名郡。郭臨江汜。已想海門山。潮聲來入耳。昔予貞元末。羈旅曾遊此。甚覺太守尊。亦諳魚酒美。因生江海興。每羨滄浪水。尚擬拂衣行。况今兼祿仕。青山峯巒接。白日烟塵起。東道旣不通。改轅遂南指。自秦窮楚越。浩蕩五千里。聞有賢主人。而多好山水。是行頗爲愜。所歷良可紀。策馬度藍溪。勝遊從此始。初出城留別

朝從紫禁歸。暮出青門去。勿言城東陌。便是江南路。揚鞭簇車馬。揮手辭親故。我生本無鄉。心安是歸處。過駱山人野居小池 駱生棄官居此二十餘年

茅覆環堵亭。泉滌方丈沼。紅芳照水荷。白頸觀魚鳥。拳石苔蒼翠。尺波烟杳眇。但問有意無。勿論池大小。門前車馬路。奔走無昏曉。名利驅人心。賢愚同擾擾。善哉路處士。安置身心了。何乃獨多君。丘園居者少。

宿清源寺

往講薄陽去。夜憩輞溪曲。今爲錢塘行。重經茲寺宿。爾來幾何歲。溪草八九綠。不見舊房僧。蒼然新樹木。虛空走日月。世界邊陵谷。我生寄其間。孰能逃倚伏。隨緣又南去。好住東廊竹。

宿藍橋對月

昨夜鳳池頭。今夜藍溪口。明月本無心。行人自迴首。新秋松影下。半夜鐘聲後。清影不宜昏。聊將茶代酒。

自望秦赴五松驛馬上偶睡睡覺成吟

長途發已久。前館行未至。體倦目已昏。臚然遂成睡。右袂尙垂鞭。左手暫委轡。忽覺問僕夫。纔行百步地。形神分處所。遲速相乖異。馬上幾多時。夢中無限事。誠哉達人語。百齡同一寐。

鄧州路中作

蕭蕭誰家林。秋梨葉半坼。漠漠誰家園。秋蕪花初白。路逢故里物。使我嗟行役。不歸渭北村。又作江南客。去鄉徒自苦。濟世終無益。自問波上萍。何如澗中石。

朱藤杖紫驄吟

拄上山之上。騎下山之下。江州去日朱藤杖。忠州歸時紫驄馬。天生二物濟我窮。我生合是栖栖者。

桐樹館重題

塔前下馬時。梁上題詩處。慘澹病使君。蕭疎老松樹。自嗟還自哂。又向杭州去。

過紫霞蘭若

我愛此山頭。及此三登歷。紫霞蘭精舍。寥落空泉石。朝市日喧隘。雲林長悄寂。猶存住寺僧。肯有歸山客。

感舊紗帽 帽卽故李侍郎所贈

昔君烏紗帽。贈我白頭翁。帽今在頂上。君已歸泉中。物故猶堪用。人亡不可逢。岐上今夜月。墳樹正秋風。

思竹齋

不憶西省松。不憶南宮菊。唯憶新昌堂。蕭蕭北窗竹。窗間枕簟在。來後何人宿。

馬上作

處世非不遇。榮身頗有餘。勳爲上柱國。爵乃朝大夫。自問有何才。兩入承明廬。又問有何政。再駕朱輪車。矧予東山人。自惟朴且疎。彈琴復有酒。但慕嵇阮徒。聞被鄉里薦。誤上賢能書。一列朝士籍。遂爲世網拘。高有響繳憂。下有陷穽虞。每覺宇宙窄。未嘗心體舒。蹉跎二十年。領下生白鬚。何言左遷去。尙獲專城居。杭州五千里。往若投淵魚。雖未脫簪組。且來汎江湖。吳中多詩人。亦不少酒醑。高聲詠篇什。大笑飛盃盂。五十未全老。尙可且歡娛。用茲送日月。君以爲何如。秋風起江上。白日落路隅。首迴語五馬。去矣勿踟蹰。

秋蝶

秋花紫蒙蒙。秋蝶黃茸茸。花低蝶新小。飛戲叢西東。日暮涼風來。紛紛花落叢。夜深白露冷。蝶已死叢中。朝生夕俱死。氣類各相從。不見千年鶴。多栖百丈松。

登商山最高頂

高高此山頂。四望唯烟雲。下有一條路。通達楚與秦。或名誘其心。或利牽其身。乘者及負者。來去何云云。我亦斯人徒。未能出囂塵。七年三往復。何得笑他人。

枯桑

道傍老枯樹。枯來非一朝。皮黃外尙活。心黑中先爛。有似多憂者。非因外火燒。

山路偶興

筋力未全衰。僕馬不至弱。又多山水趣。心賞非寂寞。捫蘿上烟嶺。踢石穿雲壑。谷鳥晚仍啼。洞花秋不落。提籠復攜榼。遇勝時停泊。泉憩茶數甌。嵐行酒一酌。獨吟還獨嘯。此興殊未惡。假使在城時。終年有何樂。

山雉

五步一啄草。十步一飲水。適性遂其生。時哉山梁雉。梁上無罾繳。梁下無鷹鷂。雌雄與羣雛。皆得終天年。梁嗟籠下雞。及彼池中鴈。既有稻粱恩。必有犧牲患。

初下漢江舟中作寄兩省給舍

秋水淅紅粒。朝煙烹白鱗。一食飽至夜。一臥安達晨。晨無朝謁勞。夜無直宿勤。不知兩掖客。何似扁舟人。尙想到郡日。且稱守土臣。猶須副憂寄。恤隱安疲民。期年庶報政。三年當退身。終使滄浪水。濯吾纓上塵。自蜀江至洞庭湖口有感而作

江從西南來。浩浩無旦夕。長波逐若瀉。連山鑿如劈。千年不擁潰。萬姓無墊溺。不爾民爲魚。大哉禹之績。

導嶼既艱遠。距海無咫尺。胡爲不訖功。餘水斯委積。洞庭與青草。大小兩相敵。混合萬丈深。森茫千里白。每歲秋夏時。浩大吞七澤。水族窟穴多。農人土地窄。我今尙嗟歎。禹豈不愛惜。邈未究其由。想古觀遺跡。疑此苗人頑。恃險不終役。帝亦無奈何。留患與今昔。水流天地內。如身有血脈。滯則爲疽疣。治之在鍼石。安得禹復生。爲唐水官伯。手提倚天劍。重來親指畫。疏流似藕紙。決壅同裂帛。滲作膏腴田。踏平魚鱉宅。龍宮變閭里。水府生禾麥。坐添百萬戶。書我司徒籍。

初領郡政衙退登東樓作 自此後詩到杭州後作

綵惇心所念。簡牘手自操。何言符竹貴。未免州縣勞。賴是餘杭郡。臺榭遠官曹。凌晨親政事。向晚恣遊遨。山冷微有雪。波平未生濤。水心如鏡面。千里無纖毫。直下江最闊。近東樓更高。煩襟與滯念。一望皆遁逃。

清調吟

索索風戒寒。沉沉日藏耀。勸君飲濁醪。聽我吟清調。芳節變窮陰。朝光成夕照。與君生此世。不合長年少。今晨從此過。明日安能料。若不結跏禪。卽須開口笑。

狂歌詞

明月照君席。白露霑我衣。勸君酒盃滿。聽我狂歌詞。五十已後衰。二十已前癡。晝夜又分半。其間幾何時。生前不歡樂。死後有餘貲。焉用黃墟下。珠衾玉匣爲。

郡亭

平旦起視事。亭午臥掩關。除親簿領外。多在琴書前。况有虛白亭。坐見海門山。潮來一凭檻。賓至一開筵。

終朝對雲水。有時聽管絃。持此聊過日。非忙亦非閑。山林太寂寞。朝闕空喧煩。唯茲郡閣內。囂靜得中間。

詠懷

昔爲鳳閣郎。今爲二千石。自覺不如今。人言不如昔。昔雖居近密。終日多憂惕。有詩不敢吟。有酒不敢喫。今雖在疎遠。竟歲無牽役。飽食坐終朝。長歌醉通夕。人生百年內。疾速如過隙。先務身安閑。次要心歡適。事有得而失。物有損而益。所以見道人。觀心不觀跡。

立春後五日

立春後五日。春態紛婀娜。白日斜漸長。碧雲低欲墮。殘冰坼玉片。新萼排紅顆。遇物盡欣欣。愛春非獨我。迎芳後園立。就暖前簷坐。還有惆悵心。欲別紅爐火。

郡中卽事

漫漫潮初平。熙熙春日至。空闊遠江山。清明好天氣。外有適意物。中無繁心事。數篇對竹吟。一盃望雲醉。行攜杖扶力。臥讀書取睡。久養病形骸。深諳閑氣味。遙思九城陌。擾擾趨名利。今朝是直日。朝謁多軒騎。寵者防悔尤。權者懷憂畏。爲報高車蓋。恐非真富貴。

郡齋暇日辱常州陳郎中使君早春晚坐水西館書事詩十六韻見寄亦以十六韻酬之

新年多暇日。晏起褰簾坐。睡足心更慵。日高頭未裹。徐傾下藥酒。稍煎煎茶火。誰伴寂寥身。無絃琴在左。遙思毗陵館。春深物媚娜。波拂黃柳梢。風搖白梅朵。衙門排曉戟。鈴閣開朝鎖。太守水西來。朱衣乘素舸。良晨不易得。佳會無由果。五馬正相望。雙魚忽前墮。魚中獲瑰寶。持翫何磊砢。一百六十言。字字靈珠顆。

上申心款曲。下敘時轍軻。才富不如君。道孤還似我。敢辭官遠慢。且貴身安妥。勿復問榮枯。冥心無不可。

官舍

高樹換新葉。陰陰覆地隅。何言太守宅。有似幽人居。太守臥其下。閑慵兩有餘。起嘗一甌茗。行讀一卷書。早梅結青實。殘櫻落紅珠。稚女弄庭果。嬉戲牽人裾。是日晚彌靜。巢禽下相呼。嘖嘖護兒鵲。啞啞母子烏。豈唯云鳥爾。吾亦引吾雛。

吾雛

吾雛字阿羅。阿羅纔七齡。嗟吾不才子。憐汝無弟兄。撫養雖驕駛。性識頗聰明。學母畫眉樣。効吾詠詩聲。我齒今欲墮。汝齒昨始生。我頭髮盡落。汝頂髻初成。老幼不相待。父衰汝孩嬰。緬想古人心。茲愛亦不輕。蔡邕念文姬。于公歎緹縈。敢求得汝力。但未忘父情。

題小橋前新竹招客

鴈齒小虹橋。垂簷低白屋。橋前何所有。苒苒新生竹。皮開拆褐錦。節露抽青玉。筠翠如可飡。粉霜不忍觸。閑吟聲未已。幽翫心頭足。管領好風烟。輕欺凡草木。誰能有月夜。伴我林中宿。爲君傾一盃。狂歌竹枝曲。

病中逢秋招客夜酌

不見詩酒客。臥來半月餘。合和新藥草。尋檢舊方書。晚霽烟景度。早涼窗戶虛。雪生衰鬢久。秋入病心初。臥簾簾竹冷。風襟邛葛疎。夜來身校健。小飲復何如。

食飽

食飽拂枕臥。睡足起閑吟。淺酌一盃酒。緩彈數弄琴。既可暢情性。亦足傲光陰。誰知利名盡。無復長安心。
嚴十八郎中在郡日。改制東南樓。因名清輝。未立標榜。徵歸郎署。予既到郡。性愛樓居。宴遊其間。頗有幽致。聊成十韻。兼戲寄嚴。

嚴郎制茲樓。立名曰清輝。未及署花榜。遽徵還粉闈。去來三四年。塵土登者稀。今春新太守。掃灑施簾幃。院柳烟婀娜。簷花雪霏微。看山倚前戶。待月闌東扉。碧窗夏瑤瑟。朱欄飄舞衣。燒香卷幕坐。風燕雙雙飛。君作不得住。我來幸因依。始知天地間。靈境有所歸。

南亭對酒送春

碧桃實已落。紅薇花尙熏。冉冉三月盡。晚鶯城上聞。獨持一盃酒。南亭送殘春。半酣忽長歌。歌中何所云。云我五十餘。未是苦老人。刺史二千石。亦不爲賤貧。天下三品官。多老於我身。同年登第者。零落無一分。親故半爲鬼。僮僕多見孫。念此聊自解。逢酒且歡欣。

翫新庭樹因詠所懷

鶯鶯四月初。新樹葉成陰。動搖風景麗。蓋覆庭院深。下有無事人。竟日此幽尋。豈唯翫時物。亦可開煩襟。時與道人語。或聽詩客吟。度春足芳色。入夜多鳴禽。偶得幽閑境。遂忘塵俗心。始知真隱者。不必在山林。

仲夏齋戒月

仲夏齋戒月。三旬斷腥羶。自覺心骨爽。行起身翩翩。始知絕粒人。四體更輕便。初能脫病患。久必成神仙。禦寇馭冷風。赤松遊紫烟。常疑此說謬。今乃知其然。我年過半百。氣衰神不全。已垂兩鬢絲。難補三丹田。

但減葦血味。稍結清淨緣。脫巾且修養。聊以終天年。

除官去未間

除官去未間。半月恣游討。朝尋霞外寺。暮宿波上島。新樹少於松。平湖半連草。躋攀有次第。賞翫無昏早。有時騎馬醉。兀兀冥天造。窮通與生死。其奈吾懷抱。江山信爲美。齒髮行將老。在郡誠未厭。歸鄉去亦好。

三年爲刺史二首

三年爲刺史。無政在人口。唯向郡城中。題詩十餘首。慚非甘棠詠。豈有思人不。三年爲刺史。飲水復食藥。唯向天竺山。取得兩片石。此抵有千金。無乃傷清白。

別萱桂

使君竟不住。萱桂徒栽種。桂有留人名。萱無忘憂用。不如江畔月。步步來相送。

自餘杭歸宿淮口作

爲郡已多暇。猶少勸吏職。罷郡更安閑。無所勞心力。舟行明月下。夜泊清淮北。豈止吾一身。舉家同燕息。三年請祿俸。頗有餘衣食。乃至僮僕間。皆無凍餒色。行行弄雲水。步步近鄉國。妻子在我前。琴書在我側。此外吾不知。於焉心自得。

舟中李山人訪宿

日暮舟悄悄。烟生水沉沉。何以延宿客。夜酒與秋琴。來客道門侶。來自嵩高岑。軒軒舉雲貌。豁豁開清襟。得意言語斷。入玄滋味深。默然相顧哂。心適而忘心。

洛下卜居

三年典郡歸。所得非金帛。天竺石兩片。華亭鶴一隻。飲啄供稻粱。苞裹用茵蓆。誠知是勞費。其奈心愛惜。遠從餘杭郭。同到洛陽陌。下檐拂雲根。開籠展霜翮。貞姿不可難。高性宜其適。遂就無塵坊。仍求有水宅。東南得幽境。樹老寒泉碧。池畔多竹陰。門前少人跡。未請中庶祿。且脫雙隲易。豈獨爲身謀。安吾鶴與石。

洛中偶作 自此後在東都作

五年職翰林。四年蒞潯陽。一年巴郡守。半年南宮郎。二年直綸閣。三年刺史堂。凡此十五載。有詩千餘章。境與周萬象。土風備四方。獨無洛中作。能不心悵悵。今爲春官長。始來遊此鄉。徘徊伊澗上。睥睨嵩山傍。遇物輒一詠。一詠傾一觴。筆下成釋憾。卷中同補亡。往往顧自晒。眼昏鬢鬢蒼。不知老將至。獨自放詩狂。

贈蘇少府

籍甚二十年。今日方款顏。相送嵩洛下。論心盃酒間。河亞懶出入。府寮多閉關。蒼髮彼此老。白日尋常閑。朝欲攜手出。暮思聯騎還。何當挈一榼。同宿龍門山。

移家入新宅

移家入新宅。麗郡有餘資。既可避燥溼。復免憂寒飢。疾平未還假。官閑得分司。幸有祿俸在。而無職役羈。清旦盥漱畢。開軒卷簾幃。家人及雞犬。隨我亦熙熙。取興或寄酒。放情不過詩。何必苦修道。此卽是無爲。外累信已遣。中懷時有思。有思一何遠。默坐低雙眉。十載囚竄客。萬里征戍兒。春朝鎖籠鳥。冬夜支床龜。驛馬走四蹄。痛酸無歇期。磴牛封兩目。關閉何人知。誰能脫放去。四散任所之。各得適其性。如吾今日時。

琴

置琴曲机上。慵坐但含情。何煩故揮弄。風絃自有聲。

鶴

人各有所好。物固無常宜。誰謂爾能舞。不如閑立時。

自詠

夜鏡隱白髮。朝酒發紅顏。可憐假年少。自笑須臾間。朱砂賤如土。不解燒爲丹。玄鬢化爲雪。未聞休得官。咄哉箇丈夫。心性何墮頑。但遇詩與酒。便忘寢與飧。高聲發一吟。似得詩中仙。引滿飲一盞。盡忘身外緣。昔有醉先生。席地而幕天。于今居處在。許我當中眠。眠罷又一酌。酌罷又一篇。迴面顧妻子。生計方落然。誠知此事非。又過知非年。豈不欲自改。改卽心不安。且向安處去。其餘皆老閑。

林下閑步寄皇甫庶子

扶杖起病初。策馬立未任。旣懶出門去。亦無客來尋。以此遂成閑。閑步遶園林。天曉烟景淡。樹寒鳥雀深。一酌池上酒。數聲竹間吟。寄言東曹長。直知幽獨心。

晏起

鳥鳴庭樹上。日照屋簷時。老去慵轉極。寒來起尤遲。厚薄被適性。高低枕得宜。神安體穩暖。此味何人知。睡足仰頭坐。兀然無所思。如未鑿七竅。若都遺四肢。緬想長安客。早朝霜滿衣。彼此各自適。不知誰是非。

池畔二首

結構池西廊。疏理池東樹。此意人不知。欲爲待月處。
持刀間密竹。竹少風來多。此意人不會。欲令池有波。

春葺新居

江州司馬日。忠州刺史時。栽松滿後院。種柳陰前墀。彼皆非吾土。栽種尙忘疲。况茲是我宅。葺葺固其宜。
平旦領僕使。乘春親指揮。移花夾暖室。洗竹覆寒池。池水變綠色。池芳動清輝。尋芳弄水坐。盡日心熙熙。
一物苟可適。萬緣都若遺。設如宅門外。有事吾不知。

贈言

捧簾獻千金。彼金何足道。臨觴贈一言。此言真可寶。流光我已晚。適意君不早。况君春風面。柔促如芳草。
二十方長成。三十向衰老。鏡中桃李色。不得十年好。胡爲坐脈脈。不肯傾懷抱。

泛春池

白蘋湘渚曲。綠篠剡溪口。各在天一涯。信美非吾有。何如此庭內。水竹交左右。霜竹百千竿。烟波六七畝。
泓澄動階砌。淡泞映戶牖。蛇皮細有文。鏡面清無垢。主人過橋來。雙童扶一叟。恐污清冷波。塵纓先抖擻。
波上一葉舟。舟中一樽酒。酒開舟不繫。去去隨所偶。或遶蒲浦前。或泊桃島後。未撥落盃花。低衝拂面柳。
半酣迷所在。倚榜兀迴首。不知此何處。復是人寰否。誰知始疏鑿。幾主相傳受。楊家去云遠。田氏將非久。
天與愛水人。終焉落吾手。

